

四庫全書

經部

欽定四庫全書

孟子集疏卷八

宋 蔡模 撰

離婁章句下

凡三十章

孟子曰舜生於諸馮遷於負夏卒於鳴條東夷之人也

諸馮負夏鳴條皆地名在東方夷服之地

文王生於岐周卒於畢郢西夷之

人也

岐周岐山下周舊邑近畎夷畢郢近豐鎬今有文王墓

地之相去也十有餘

里世之相後也十有餘歲得志行乎中國若合符節

得志

行乎中國謂舜為天子文王為方伯得行其道於天下也符節以玉為之篆刻文字而中分之彼此各藏其半

有故則左右相合以爲信也若合符節言其同也

先聖後聖其揆一也

揆度也其揆一

者言度之而其道無不同也○范氏曰言聖人之生雖有先後遠近之不同然其道則一也○集疏曰朱子曰言古人所爲恰與我相合只此便是至善前乎千百世之已往後乎千百世之未來只是此箇道理孟子所謂得志行乎中國若合符節正謂是爾或問孟子以舜卒於鳴條則湯與桀戰之地而竹書有南巡不反禮記有葬於蒼梧之說何邪曰孟子之言必有所據二書駁雜恐難盡信然無他考驗則亦論而闕之可也問符節之制曰古人多以玉爲之如牙璋以起軍旅周禮中有以玉爲符節又有竹符又有英蕩符蕩小節竹今使者謂之蕩節也刻之爲符漢有銅虎符竹使符銅虎以起兵竹使郡守用之凡符節右留君所左以與其人有故則君以其右合其左以爲信也曲禮曰獻田地者執右契右者取物之券也如發兵取物徵召皆以右取之也

○子產聽鄭國之政以其乘輿濟人於溱洧

乘去聲溱音臻洧音榮

美反○子產鄭大夫公孫僑也溱洧二水名也子產見人有徒涉此水者以其所乘之車載而渡之

孟子

曰惠而不知為政

惠謂私恩小利政則有公平正大之體綱紀法度之施焉

歲十一

月徒杠成十二月輿梁成民未病涉也

杠音江○杠方橋也徒杠可通

徒行者梁亦橋也輿梁可通車輿者周十一月夏九月也周十二月夏十月也夏今日十月成梁蓋農功已畢可用民力又時將寒泆水有橋梁則民不患於徒涉亦王政之一事也

君子平其政行辟

人可也焉得人人而濟之

辟與闢同焉於虔反○辟辟除也如周禮闢人為之辟之

辟言能平其政則出行之際辟除行人使之避已亦不為過況國中之水當涉者衆豈能悉以乘輿濟之哉

故為政者每人而悅之日亦不足矣

言每人皆欲致私恩以悅其意則人

多日少亦不足於用矣諸葛武侯嘗言治世以大德不以小惠得孟子之意矣○集疏曰或問孔子以子產之惠為君子之道而子以私恩小利言之何也曰孔子之言通乎巨細故不害其為君子之道此承上文乘輿濟人而言則私恩小利而已矣曰子產濟人之事有仁人之心焉其惠雖小猶不失乎為政之本若孟子所謂先王之政者乃獨以時脩橋梁而已將不反為治之末邪徒謹於此而愛人之心不至吾恐其所以自結於民者或反不若子產之深也曰子產之事可謂有不忍人之心矣然先王以不忍人之心而行不忍人之政是以其體正大而均平其法精密而詳盡而其利澤之及人如天地之於萬物莫不各足其分而莫知其功之所自苟有是心而無是政則不過能煦濡姑息苟取悅於目前而結其驩虞之愛顧其耳目之所不及則恩惠之施已

不免於有所遺矣況以天下國家之大又安得人人而濟之邪昔諸葛武侯嘗言治世以大德不以小惠而其治蜀也官府次舍橋梁道路莫不繕理是亦庶幾乎先王之政矣曰子產相鄭能使都鄙有章上下有服田有封洫廬井有伍則非不知為政者橋梁之脩尤非難事乃獨有闕於此何邪曰子產之才之學於先王之政雖有所未盡然其於橋梁之脩蓋有餘力而其惠之及人亦有大於乘輿之濟者矣意者此時偶有故而未就又不忍乎冬涉之艱而為是者然暴其小惠以悅於人人亦悅而稱之孟子慮夫後之為政者或又悅而效之則其流必將有廢公道以市私恩違正理以干虛譽者故極語而深譏之以警其微亦拔本塞源之意也此說最為得

○孟子告齊宣王曰君之視臣如手足則臣視君如腹心君之視臣如犬馬則臣視君如國人君之視臣

如土芥則臣視君如寇讎

孔氏曰宣王之遇臣下恩禮衰薄至於昔者所進今日不

知其亡則其於羣臣可謂邈然無敬矣故孟子告之以此手足腹心相待一體恩義之至也如犬馬則輕賤之

然猶有秦養之恩焉國人猶言路人言無怨無德也土芥則踐踏之而已矣斬艾之而已矣其賤惡之又甚矣

寇讎之報不亦宜乎

王曰禮為舊君有服何如斯可為服矣

為去聲下

為之同○儀禮曰以道去君而未絕者服齊衰三月王疑孟子之言太甚故以此禮為問

曰諫行言

聽膏澤下於民有故而去則君使人導之出疆又先於

其所往去三年不反然後收其田里此之謂三有禮焉

如此則為之服矣

導之出疆防剽掠也先於其所往稱道其賢欲其收用之也三年而後收

其田祿里居前
此猶望其歸也

今也為臣諫則不行言則不聽膏澤不

下於民有故而去則君搏執之又極之於其所往去之

日遂收其田里此之謂寇讎寇讎何服之有

極窮也窮之於其所

往之國如晉錮欒盈也○潘興嗣曰孟子告齊宣王之
言猶孔子對定公之意也而其言有迹不若孔子之渾
然也蓋聖賢之別如此楊氏曰君臣以義合者也故孟
子為齊王深言報施之道使知為君者不可不以禮遇
其臣耳若君子之自處則豈處其薄乎孟子曰王庶幾
改之予日望之君子之言蓋如此○集疏曰案呂氏曰
此說君臣相待厚薄感應之理非謂待之之禮當如寇
讎臣罪當誅分天王聖明韓退之此語如何道是好文
王豈不知紂之無道却如此說蓋臣子無說君父不是
底道理只得說如此此是去不得處便見得是君臣之

義○潘興嗣字延之

○孟子曰無罪而殺士則大夫可以去無罪

而戮民則士可以徙

言君子當見幾而作禍已迫則不能去矣

○孟子曰君

仁莫不仁君義莫不義

張氏曰此章重出然上篇主言人臣當以正君為急此章直戒

人君義亦小異耳

○孟子曰非禮之禮非義之義大人弗為

察理

不精故有二者之蔽大人則隨事而順理因時而處宜豈為是哉○集疏曰或問非禮之禮非義之義何謂也程子曰恭本為禮過恭是非禮之禮也以物予人為義過予是非義之義也張子曰非禮之禮非義之義但非時中者皆是也時中之宜甚矣須精義入神觀其會通以行其典禮此方是真義理也

○孟子曰

中也養不中才也養不才故人樂有賢父兄也如中也

棄不中才也棄不才則賢不肖之相去其間不能以寸

樂音洛○無過不及之謂中足以有為之謂才養謂涵育薰陶俟其自化也賢謂中而才者也樂有賢父兄者樂其終能成已也為父兄者若以子弟之不賢遂遽絕之而不能教則吾亦過中而不才矣其相去之間能幾何哉○集疏曰朱子曰養者非速使之中使之才漸民以仁摩民以義之謂下以善養人同○孟子

曰人有不為也而後可以有為

程子曰有不為知所擇也惟能有不為是以可

以有為無所不為者安能有所為邪

○孟子曰言人之不善當如後患何

此亦有為而言○集疏曰或問所謂後患者謂得罪於其人邪抑恐其亦言已之不善邪曰是皆有之然斯言必有為而發今不可知其所指矣○孟子曰仲尼不為已甚者已猶太也楊氏

曰言聖人所為本分之外不加毫末非孟子真知孔子不能以是稱之○集疏曰或問楊氏之說曰所謂本分者乃義理之至當非苟然而已也學者於此宜深察之一有小差則流而入於鄉原之亂德矣又曰稱人之善不可有心於溢美稱人之惡不可有心於溢惡皆不為已甚之事也或上龜山書云徐行從長得堯舜之道不為已甚知仲尼之心龜山平日喜此兩句也○孟子曰大人者言不必信行

不必果惟義所在

行去聲○必猶期也大人言行不先期於信果但義之所在則必從之卒

亦未嘗不信果也○尹氏曰主於義則信果在其中矣主於信果則未必合義王勉曰若不合於義而不信不果則妄人爾○集疏曰或問諸說曰尹氏所謂信果在其中者亦其言外之餘意也○孟子曰大

人者不失其赤子之心者也

大人之心通達萬變赤子之心則純一無偽而已然

大人之所以為大人正以其不為物誘而有以全其純一無偽之本然是以擴而充之則無所不知無所不能而極其大也○集疏曰或問赤子之心張子呂氏以為未發而程子以為已發夫赤子之心固不可為未發然豈不亦有未發之時乎曰程子之告呂與叔固自以前所謂言心皆指已發者為未當矣夫赤子之心衆人之心各有未發已發之時但赤子之心未有私意人欲之累故雖其已發而未必中節要亦為未遠乎中耳曰程子所謂聖人之明鑑止水其所以異於赤子之純一無偽者何也曰赤子之心全未有知然以其未有私意人欲之累也則亦純一無偽而已爾衆人既有所知則雜乎私意人欲而失之聖人則明物察倫酬酢萬變而私意人欲淨盡不留是以若明鑑止水之湛然不動而物無不照也又曰赤子之心固無巧偽但於理義未能知覺渾然赤子之心而已大人則有知覺擴充之功而無巧偽安排之鑿故曰不失赤子之心著箇不失字便是

不同處張敬夫謂從初不失此恐太拘既失而反之却到此地位亦何害其為不失乎又曰大人無所不知無所不能却是赤子無所知無所能赤子之心純一無偽而大人之心亦純一無偽但赤子是無知能底純一無偽大人是有知能底純一無偽

○孟子曰養生者不足以當大事惟送

死可以當大事

養去聲○事生固當愛敬然亦人道之常耳至於送死則人道之大變孝子之

事親舍是無以用其力矣故尤以為大事而必誠必信不使少有後日之悔也○集疏曰王德脩云親聞和靖說惟送死可以當大事曰親之生也好惡取舍得以言焉及其死也好惡取舍無得而言當是時親之心即子之心子之心即親之心故曰惟送死可以當大事此亦說得好

○孟子曰君子深造之

以道欲其自得之也自得之則居之安居之安則資之

深資之深則取之左右逢其原故君子欲其自得之也

造七到反○造詣也深造之者進而不已之意道則其進為之方也資猶藉也左右身之兩旁言至近而非一處也逢猶值也原本也水之來處也言君子務於深造而必以其道者欲其有所持循以俟夫默識心通自然而得之於已也自得於已則所以處之者安固而不搖處之安固則所藉者深遠而無盡所藉者深則日用之間取之至近無所往而不值其所資之本也○程子曰學不言而自得者乃自得也有安排布置者皆非自得也然必潛心積慮優游饜飫於其間然後可以有得若急迫求之則是私已而已終不足以得之也○集疏曰或問君子深造之以道欲其自得之何也曰學是理則必是理之得於身也不得於身則口耳焉而已矣然又不可以彊探而力取也必其深造之以道然後有以默識心通而自然得之也蓋造道之不深者用力於皮膚

之外而責效於日用之間不以其道者從事於虛寂之功而妄意於言意之表是皆不足致乎默識心通之妙而自得之也必多致其力而不急其功必務其方而不躡其等則雖不期於必得而其自然得之將有不可禦者矣曰自得之則居之安何也曰未得之則固無可居之地得而不出於自然則雖有所居而不安惟自得之則理之在我者吾皆得以居之如人有室廬之安動作起居種種便適自眷戀而不去也曰居之安則資之深何也曰未得其所居則無所藉以為用居而未安則其所藉以為用者淺迫而易窮惟居之安則理之在我者吾皆得藉以為用而無窮如富人蓄積之多金珠穀帛無求不獲見其出而不見其盡也曰資之深則取之左右逢其原何也曰無所資者固無本之可求資之淺者取之艱遠而或值或不值也惟資之深者不待遠求而所取無不得如既取其身之左而值其所資之本又取其身之右而復值其所資之本以水譬之苟其源之盛

則滔滔汨汨不舍晝夜或沂或浴無不值其來處此君子所以欲其自得之也問集註道者進為之方是如何曰此是趙岐之說亦未甚親切却只是循道以進耳又云君子深造之以道語勢似稍倒道字合在深造之前方是蓋道是造道之方法循此進進不已便是深造之猶言以這方法去深造之也今曰深造之以道是深造之以其方法也以道是工夫深造是做工夫如博學審問慎思明辨篤行之次序即是造道之方法若人為學依次序便是以道不依次序便不是以道能以道而為之不已造之愈深則自然而得之既自得之而為我有則居之安居之安則資之深資之深一句又要人看蓋自家既自得之則所以資藉者深取之無窮用之不竭只管取只管有滾滾地出來無窮自家資他他又資給自家如掘地在下藉上面源頭水來注滿若源頭深則源源來不竭又如富人大寶藏裏只管取只管有取之左右逢其原蓋這件事也撞著這本來底道理那件事

也撞著這本來底道理事物頭件件皆撞著這道理如資之深那源頭水只是一路來到得左右逢原四方八面都來然這箇只在自得上纔自得則下面節次自是如此又曰君子深造之以道欲其自得之也深造正與淺躁相反若不深造而欲以淺迫得之便是彊探力取深造者只是既下工夫又下工夫待其真積力久則自得之矣所謂優游饜飫只深造後自如此非深造之外別又欲其自得也與下章博學而詳說之將以

反說約之義同

○孟子曰博學而詳說之將以反說約也

言所以博

學於文而詳說其理者非欲以誇多而闢靡也欲其融會貫通有以反而說到至約之地耳蓋承上章之意而言學非欲其徒博而亦不可以徑約也○集疏曰程子曰博與約正相對聖人教人只此兩字博是博學多識多聞多見之謂約只是使人知要也楊氏曰揚雄云多聞守之以約多見守之以卓其言終有病與孟子之言

異矣蓋博學詳說所以趨約至於約則其道得矣謂之守以約卓於多聞多見之中將何以爲約卓而守之中乎或問十五章之說朱子曰所謂約者吾於論語已言之矣此則正以知要而言也然亦上章之餘意故記者屬之蓋博學詳說者以道深造之謂其曰將以反說約者則欲其自得之深也曰楊氏分別孟揚得失如何曰意極親切然語亦有未盡使讀者不能無疑蓋所謂博約由孟子之言則博者所以極夫理之散殊約則舉是散殊而一貫之耳是以旣博學之又詳說之而又卒會于約蓋所謂博且詳固未嘗出於約之外而所謂約於博且詳者又未嘗有所遺也由揚子之言則所謂約者乃博中之一物方其博也固不知此之爲約而茫然泛然雜取乎其外及其約也則又守此一物而於所謂博者之中僅乃處其千萬之一焉是亦何足以爲約而守之乎以是推之則楊氏之意得矣又曰約自博中來旣博學又詳說講學直是精確將來臨事自有箇頭緒纔

有頭緒便見簡約若是平日講貫得不詳悉及至臨事只覺得千頭萬緒更理會不下如此則豈得為約又云通貫處便是約不是通貫了又去裏面尋討箇約程子說格物處云但積累多後自脫然有貫通處積累多後便是學之博脫然有貫通處便是約又云某嘗不喜揚子雲多聞則守之以約多見則守之以卓之說多聞了又更要一箇約去守他正如說貫通了又別去尋討箇約也

○孟子曰以善服人者

未有能服人者也以善養人然後能服天下天下不心

服而王者未之有也

王去聲○服人者欲以取勝於人養人者欲其同歸於善蓋心之公

私小異而人之嚮背頓殊學者於此不可以不審也○集疏曰朱子曰以善服人者唯恐人之進於善也如張華之對晉武帝恐吳人更立令主則江南不可取之類是也以善養人者惟恐人之不入於善也若湯之事葛

遺之牛羊使人往
為之耕之類是也

○孟子曰言無實不祥不祥之實蔽

賢者當之

或曰天下之言無有實不祥者惟蔽賢為不祥之實或曰言而無實者不祥故蔽賢為不

祥之實二說不同未知孰是疑或有闕文焉

○徐子曰仲尼亟稱於水曰水

哉水哉何取於水也

亟去吏反○亟數也水哉水哉歎美之辭

孟子曰原泉

混混不舍晝夜盈科而後進放乎四海有本者如是是

之取爾

舍放皆上聲○原泉有原之水也混混湧出之貌不舍晝夜言常出不竭也盈滿也科坎也言

其進以漸也放至也言水有原本不已而漸進以至於海如人有實行則亦不已而漸進以至於極也苟

為無本七八月之間雨集溝澮皆盈其涸也可立而待

也故聲聞過情君子恥之

○滄古外反澗下各反聞去聲也集聚也滄田間水道也澗

乾也如人無實行而暴得虛譽不能長久也聲聞名譽也情實也恥者恥其無實而將不繼也林氏曰徐子之為人必有蹠等干譽之病故孟子以是答之○鄒氏曰孔子之稱水其旨微矣孟子獨取此者自徐子之所急者言之也孔子嘗以聞達告子張矣達者有本之謂也聞則無本之謂也然則學者其可以不務本乎○集疏曰所謂聲聞過情這箇大段務外且更就中間言之如為善無真實懇惻之意為學而勉彊苟且徇人皆是不實就此反躬
○孟子曰人之所以異於禽獸者幾希庶
思量方得

民去之君子存之

幾希少也庶衆也人物之生同得天地之理以為性同得天地之氣以為

形其不同者獨人於其間得形氣之正而能有以全其性為少異耳雖曰少異然人物之所以分實在於此衆

人不知此而去之則名雖為人而實無以異於禽獸君子知此而存之是以戰兢惕厲而卒能有以全其所受之正

舜明於庶物察於人倫由仁義行非行仁義也

事物

物也明則有以識其理也人倫說見前篇察則有以盡其理之詳也物理固非度外而人倫尤切於身故其知之有詳略之異在舜則皆生而知之也由仁義行非行仁義則仁義已根於心而所行皆從此出非以仁義為美而後勉彊行之所謂安而行之也此則聖人之事不待存之而無不存矣○尹氏曰存之者君子也存者聖人也君子所存存天理也由仁義行存者能之○集疏曰問人之所以異於禽獸幾希處曰人物之所同者理也所不同者氣也人心虛靈無所不明禽獸便昏了只有一兩路子明如父子有愛雌雄有別之類人之虛靈皆推得去禽獸便推不去人若以私欲蔽此虛靈便是禽獸人與禽獸只爭這些子所以謂之幾希又云察深

於明與易繫明於天之道察於民之故同程子曰人只簡天理却不能存得更做恁人又曰舜明於庶物察於人倫然後由仁義行張子曰明庶物察人倫然後能精義致用率其仁義而行或問明物察倫而後能由仁義行程子張子之說如何曰是三言者以學者言之則有序猶格物致知而後意誠心正也以聖人言之則生知安行不可以先後言矣二夫子之言亦以其始終條理言之非真以為有先後也問孟子何以只說舜曰堯自是渾然舜却是就事物上經歷一一理會過

○孟子曰禹惡旨酒而好善言

惡好皆去聲○戰國策曰儀狄作酒禹飲而甘之曰後世必有以酒亡其國者遂疏儀狄而絕旨酒書曰禹拜昌湯執中立賢無方

執謂守而不失中者無過不及之名方猶類也立賢無方惟賢則立

之於位不問其類也文王視民如傷望道而未之見

而讀為如古字通用○民

已安矣而視之猶若有傷道已至矣而望之猶若未見
聖人之愛民深而求道切如此不自滿足終日乾乾之
心武王不泄邇不忘遠泄狎也邇者人所易狎而不泄遠者人所易忘而不忘德之盛

仁之至也

周公思兼三王以施四事其有不合者仰而思之

夜以繼日幸而得之坐以待旦

三王禹也湯也文武也四事上四條之事也時

異勢殊故其事或有所不合思而得之則其理初不異
矣坐以待旦急於行也○此承上章言舜因歷叙羣聖
以繼之而各舉其一事以見其憂勤惕厲之意蓋天理
之所以常存而人心之所以不死也○程子曰孟子所
稱各因其一事而言非謂武王不能執中立賢湯却泄
邇忘遠也人謂各舉其盛亦非也聖人亦無不盛○集
疏曰問湯莫是執中道以立賢否朱子曰不然執中自
是執中立賢自是立賢但執中却與子莫之執中不同

故集註謂守而不失也問程張皆以望道為望治集註謂求道之切如此竊謂博施濟衆脩己以安百姓堯舜猶以為病文王之心即此心也不知是否曰不顯亦臨無射亦保是文王望道如未見之事又曰望道而未之見此句與上文視民如傷為對孟子之意曰文王保民之至而視之猶如傷體道之極而望之猶未之見其純亦不已如是或問以而為如亦有據乎曰詩曰垂帶而厲鄭箋曰而亦如也此以而為如也春秋星隕如雨左氏曰與雨偕也此以如為而也故陸氏釋文序論音讀之訛曰而如靡異則混讀互用久矣曰求道之切恐非所以言聖人之心也奈何曰正以其德為聖人而心不自足如此是乃所以深明聖人之心也胡不以視民如傷例觀之乎夫文王之民固已無凍餒者矣而視之猶若有傷則其於道雖已與之為一亦何害其望之如未見哉曰有謂武王之不泄邇不忘遠非仁也勢不得不然也信乎曰此以世俗計較之私心窺度聖人者之言

也聖人之心所以異於衆人者以其大公至正周流貫徹無所偏倚雖以天下之大萬物之多而視之無異於一身爾是以其於人之病癢疾痛無有不知而所以撫摩而抑搔之者無有不及此武王之不泄邇不忘遠所以為德之盛而仁之至也今日迫於勢而非仁則不知其視聖人之心為如何而指所謂仁者為何物哉○

孟子曰王者之迹熄而詩亡詩亡然後春秋作

王者之迹熄謂

平王東遷而政教號令不及於天下也詩亡謂秦離降為國風而雅亡也春秋魯史記之名孔子因而筆削之始於魯隱公之元年實平王之四十九年也

晉之乘楚之檮杌魯之春秋一

也

乘去聲檮音逃杌音兀○乘義未詳趙氏以為興於田賦乘馬之事或曰取記載當時行事而名之也檮

杌惡獸名古者因以為凶人之號取記惡垂戒之義也春秋者記事者必表年以首事年有四時故錯舉以為

所記之名也古者列國皆有史官掌記時事此三者皆其所記冊書之名也

其事則齊桓晉

文其文則史孔子曰其義則丘竊取之矣

春秋之時五霸迭興而桓

文為盛史史官也竊取者謙辭也公羊傳作其辭則丘有罪焉爾意亦如此蓋言斷之在已所謂筆則筆削則削游夏不能贊一辭者也尹氏曰言孔子作春秋亦以史之文載當時之事也而其義則定天下之邪正為百王之大法○此又承上章歷叙羣聖因以孔子之事繼之而孔子之事莫大於春秋故特言之○集疏曰楊氏云王者之迹熄而詩亡詩亡然後春秋作春秋之時詩非盡亡也黍離降而為國風則雅之詩亡矣雅亡則無政春秋所為作也然孔子曰述而不作孟子曰孔子作春秋何也蓋當是時周雖未亡所存者名位而已慶賞刑威不行焉孔子以一字為褒貶以代刑賞前此未有也故曰春秋天子之事也故謂之作然其事則齊桓晉

文其文則史其義則丘竊取之是亦述之而已胡氏春秋傳曰案邶鄘而下多春秋時詩也而謂詩亡然後春秋作何也自黍離降為國風天下無復有雅而王者之詩亡矣春秋作於隱公適當雅亡之後問王者之迹熄而詩亡詩亡然後春秋作先儒謂自東遷之後黍離降為國風而雅亡矣恐是孔子刪詩之時降之曰亦是當時自如此要識此詩如周南召南在鎬豐之時其詩為二南後來在洛邑時其詩為黍離只是二南進而為二雅二雅退而為王風二南之於二雅便是如登山到得黍離時節便是下坡了蔡氏云王者之迹熄傷王者之迹熄而其義不明也其事則齊桓晉文其文則史言春秋所載之事與文也其義則丘竊取之矣其義冒上文王者而言蓋王者之義也孔子有王者之德而無王者之位故竊取王者之義而定二百四十二年之邪正所謂為百王不易之大法者也竊取者以無其位而用其法所謂罪我者也春秋成而亂臣賊子懼所謂知我者

也

○孟子曰君子之澤五世而斬小人之澤五世而斬

澤猶言流風餘韻也父子相繼為一世三十年亦為一世斬絕也大約君子小人之澤五世而絕也楊氏曰四世而絕服之窮也五世祖免殺同姓也六世予未得為親屬竭矣服窮則遺澤寢微故五世而斬

孔子徒也予私淑諸人也

私猶竊也淑善也李氏以為方言是也人謂子思之徒也

自孔子卒至孟子遊梁時方百四十餘年而孟子已老然則孟子之生去孔子未百年也故孟子言予雖未得親受業於孔子之門然聖人之澤尚存猶有能傳其學者故我得聞孔子之道於人而私竊以善其身蓋推尊孔子而自謙之辭也○此又承上三章歷叙舜禹至於周孔而以是終之其詞雖謙然其所以自任之重亦有所不得而辭者矣○集疏曰張子曰君子之澤五世而斬蓋謂孟子去孔子猶在五世之內雖不親為弟子其餘

澤在人我得私取以為善朱子曰
讀此一篇使人心惕然而常存也
○孟子曰可以取可

以無取取傷廉可以與可以無與與傷惠可以死可以

無死死傷勇

先言可以者略見而自許之辭也後言可以無者深察而自疑之辭也過取固害於

廉然過與亦反害其惠過死亦反害其勇蓋過猶不及之意也林氏曰公西華受五秉之粟是傷廉也冉子與之是傷惠也子路之死於衛是傷勇也○集疏曰朱子曰可以取可以無取是先見得可以取後來却見得可以無取如此而取之則傷於廉矣蓋後來見者尤定故也與死亦然或問取者貪之屬不取者廉之屬猶與之為惠不與之為嗇死之為勇不死之為怯也今以過取者為傷廉則宜以不與為傷惠不死為傷勇矣而反以與為傷惠死為傷勇何哉曰過取之傷廉過於此而侵奪於彼者也過與之傷惠過死之傷勇過於此而反病

乎此者也蓋奪乎彼者其失為易見而病乎此其失為難知也故孟子舉傷廉以例二者是亦孔子過猶不及之意耳○王彥輔曰可以死可以無死死傷勇夫人之於死也何以知其不可哉蓋視義為去就死生之際惟義所在則義所以對死者程子聞而語之曰不然義無對朱子曰程子所謂義無對者精約有味問取之傷廉不難於擇矣可與不可與可死不可死之間不幸擇之不精與其吝嗇寧過與與其苟生寧就死在學者則當平日極其窮理之功庶於取舍死生之際不難於精擇也曰此意極好但孟子之意却是恐人過與而輕死也

○逢蒙學射於羿盡羿之道思天下惟羿為愈已於是

殺羿孟子曰是亦羿有罪焉公明儀曰宜若無罪焉曰

薄乎云爾惡得無罪

逢薄江反惡平聲○羿有窮后羿也逢蒙羿之家衆也羿善射篡夏

自立後為家衆所殺愈猶勝也薄言其罪差薄耳

鄭人使子濯孺子侵衛衛使

庾公之斯追之子濯孺子曰今日我疾作不可以執弓
吾死矣夫問其僕曰追我者誰也其僕曰庾公之斯也
曰吾生矣其僕曰庾公之斯衛之善射者也夫子曰吾
生何謂也曰庾公之斯學射於尹公之他尹公之他學
射於我夫尹公之他端人也其取友必端矣庾公之斯
至曰夫子何為不執弓曰今日我疾作不可以執弓曰
小人學射於尹公之他尹公之他學射於夫子我不忍

以夫子之道反害夫子雖然今日之事君事也我不敢

廢抽矢扣輪去其金發乘矢而後反

他徒河反矣夫尹之夫並音扶去

上聲乘去聲○之語助也僕御也尹公他亦衛人也端正也孺子以尹公正人知其取友必正故度庾公必不害已小人庾公自稱也金鏃也扣輪出鏃令不害人乃以射也乘矢四矢也孟子言使羿如子濯孺子得尹公他而教之則必無逢蒙之禍然夷羿篡弑之賊蒙乃遂儔庾斯雖全私恩亦廢公義其事皆無足論者孟子蓋特以取友而言耳○集疏曰程子曰子濯孺子為將之事孟子只取其不背師之意○孟子曰西

子蒙不潔則人皆掩鼻而過之

西子美婦人蒙猶冒也不潔汙穢之物也掩鼻

惡其臭也

雖有惡人齊戒沐浴則可以祀上帝

齊側皆反○惡人醜貌者

也○尹氏曰此章戒人之喪善而勉人以自新也

○孟子曰天下之言性也則

故而已矣故者以利為本

性者人物所得以生之理也故者其已然之跡若所謂天

下之故者也利猶順也語其自然之勢也言事物之理雖若無形而難知其發見之已然則必有迹而易見

故天下之言性者但言其故而理自明猶所謂善言天者必有驗於人也然其所謂故者又必本其自然之勢如人之善水之下非有所矯揉造作而然者

也若人之為惡水之在山則非自然之故矣所惡於智

者為其鑿也如智者若禹之行水也則無惡於智矣禹

之行水也行其所無事也如智者亦行其所無事則智

亦大矣

惡為皆去聲○天下之理本皆順利小智之人務為穿鑿所以失之禹之行水則因其自然之

勢而導之未嘗以私智穿鑿而有所事
是以水得其潤下之性而不為害也

天之高也星辰

之遠也苟求其故千歲之日至可坐而致也

天雖高星辰雖遠然

求其已然之迹則其運有常雖千歲之久其日至之度
可坐而得況於事物之近若因其故而求之豈有不得
其理者而何以穿鑿為哉必言日至者造曆者以上古
十一月甲子朔夜半冬至為厯元也○程子曰此章專
為智而發愚謂事物之理莫非自然順而循之則為大
智若用小智而鑿以自私則害於性而反為不智程子
之言可謂深得此章之旨矣○集疏曰問程子謂則語
助也故者本如是也今言天下萬物之性必求其故者
只是欲順而不害之也此說如何朱子曰則字亦不可
作助語看了則有不足之意性最難名狀天下之言性
者止說得故而已矣故字難為別下字如故有所以然
之意利順也順其所以然則不失其本性矣問程子以

為言天下萬物之性何也曰此倒說了文勢只是云天
下之言性者止可說故而已矣如此則天下萬物之性
在其間矣故是已然之迹父子之所以親君臣之所以
義夫婦之別長幼之序皆有箇已然之迹但只順利處
便是故之本如水之性故下也然搏之過顛激之在山
便非其性爾仁義禮智性也仁之惻隱義之羞惡禮之
辭讓智之是非此即性之故也四端則無不順利然四
端皆有相反者如殘忍之非仁不恥之非義不遜之非
禮昏惑之非智即故之不利者也又曰故者已然之迹
也如性之有仁義禮智不可得而見而惻隱羞惡恭敬
是非則有已然之迹矣然四者之發非有所矯揉而後
成也非以利為本邪語錄云性最難名狀所以只就故
上說故是已發見者便分明易見集註謂故者已然之
迹緣無箇字下得故下箇迹字或問程子以此章專為
智而發今以章首之言推之恐其或為性發而非智之
謂也曰不然章首之言所以發明天下事物莫不各有

自然之理又皆有迹而可尋以見智之不必用而不可用其下遂言惡夫鑒智之說而卒又歸章旨之意使其專為性發則其言之詳略豈當若是其倒置哉問故者以利為本與苟求其故一轍否曰歷象自今日推算而上極於太古開闢之時更無差錯只為有此已然之迹可以推測耳天與星辰間或踰度有少差錯久之自復其常以利為本亦猶天與星辰循常度而行苟不如是皆鑒之謂也棋謂禹之行水行其所無事即禹貢導潁導淮導渭導洛凡十二處無非因水性之所以然而導也達之

○公行子有子之喪右師往弔入門有進而與右

師言者有就右師之位而與右師言者

公行子齊大夫右師王驪也

孟子不與右師言右師不悅曰諸君子皆與驪言孟子

獨不與驪言是簡驪也

簡略也

孟子聞之曰禮朝廷不歷

位而相與言不踰階而相揖也我欲行禮子教以我為

簡不亦異乎

朝音潮○是時齊卿大夫以君命弔各有位次若周禮凡有爵者之喪禮則職喪蒞

其禁令序其事故云朝廷也歷更涉也位他人之位也右師未就位而進與之言則右師歷已之位矣右師已就位而就與之言則已歷右師之位矣孟子右師之位又不同階孟子不敢失此禮故不與右師言也○集疏曰或問此章之說愚嘗聞之師曰陳司敗譏孔子為有黨而孔子受之不辭右師以孟子為簡已而孟子辨之如此其力聖賢地位固不同也使孟子聞右師之言而曰禮也足矣無已而曰朝廷不歷位而相與言不踰階而揖則已微見圭角矣然猶可也而又必盡其辭焉此所以鋒芒發露而不及孔子之渾然也學者於此宜致

察焉又曰朝廷之禮既然則當是之時雖不鄙之亦不得與之言矣鄙王驩事於出吊處已見之此章之意則以朝廷之禮為重時事不同理各有當聖賢之言無所苟也 ○孟子曰君子所以異

於人者以其存心也君子以仁存心以禮存心

以仁禮存心言

以是存於心而不忘也○集疏曰問君子以仁存心以禮存心是本有此仁禮只要常存而不忘否曰非也他這箇從存心上說下來言君子所以異於小人者以其存心不同耳君子則以仁以禮而存之於心小人則以不仁不禮而存之於心這箇存心與存其心養其性底不同只是處心與人不同 仁者愛人有

禮者敬人

此仁禮之施

愛人者人恒愛之敬人者人恒敬之

恒胡登反○此仁禮之驗

有人於此其待我以橫逆則君子必自反

也我必不仁也必無禮也此物奚宜至哉

橫去聲下同
○橫逆謂彊

暴不順理
也物事也

其自反而仁矣自反而有禮矣其橫逆由是

也君子必自反也我必不忠

由與猶同下放此○忠者
盡已之謂我必不忠恐所

以愛敬人者有
所不盡其心也

自反而忠矣其橫逆由是也君子曰此

亦妄人也已矣如此則與禽獸奚擇哉於禽獸又何難

焉

難去聲○奚擇何異也又
何難焉言不足與之校也

是故君子有終身之憂無

一朝之患也乃若所憂則有之舜人也我亦人也舜為

法於天下可傳於後世我由未免為鄉人也是則可憂

也憂之如何如舜而已矣

集疏曰朱子曰舜為法於天下可傳於後世我猶未免為

鄉人是則可憂也此便是知恥知恥則進學不得不勇

若夫君子所患則亡矣非

仁無為也非禮無行也如有一朝之患則君子不患矣

夫音扶○鄉人鄉里之常人也君子存心不苟故無後憂○集疏曰或問楊氏以孟子之自反不如顏子之不校愚謂此說固善然不校者不見可校乃盛德自然之事自反者反求諸己乃下學用力之方高下淺深各有攸當學者若於橫逆之來不務自反而欲直以不校為事則亦妄意躁等而卒為顛墮苟且之歸矣可不審哉曰古之聖人多矣必言舜為法於天下何也曰法者人倫而已也聖人因其常而處之不失未足以見人道之盡惟舜極其變而不失其常是以人道之盡於此尤可以見焉故特舉舜而為言耳然其所謂法者亦豈舜之

自為哉但性天之妙人所難明而舜之所行有以盡發其蘊使天下後世無不見聞故舉舜以為法耳程子所謂觀乎聖人則見天地者正謂此也 ○禹稷當平世三過其門而不入孔

子賢之

事見前篇

顏子當亂世居於陋巷一簞食一瓢飲人

不堪其憂顏子不改其樂孔子賢之

食音嗣 樂音洛

孟子曰禹

稷顏回同道

聖賢之道進則救民退則脩己其心一而已矣

禹思天下有溺者

由己溺之也稷思天下有飢者由己飢之也是以如是

其急也

由與猶同○禹稷身任其職故以為己責而救之急也

禹稷顏子易地則

皆然

聖賢之心無所偏倚隨感而應各盡其道故使禹稷居顏子之地則亦能樂顏子之樂使顏子居禹

援之任亦能憂
禹稷之憂也

今有同室之人鬪者救之雖被髮纓冠

而救之可也

不服束髮而結纓往救言急也以喻禹稷

鄉鄰有鬪者被髮纓

冠而往救之則惑也雖閉戶可也

喻顏子也○此章言聖賢心無不同事則

所遭或異然處之各當其理是乃所以為同也尹氏曰當其可之謂時前聖後聖其心一也故所遇皆盡善○集疏曰案程子曰記曰君子而時中如三過其門而不入在禹稷之世為中若居陋巷則不中矣居陋巷在顏子之時為中三過其門而不入則非中矣故曰禹稷顏子易地則皆然張子曰禹稷顏子易地則皆然顏子固可以為禹稷之事如不伐善無施勞是乃禹稷之事也顏子勿用耳其出其處更觀人臨時志守如何楊氏答陳瑩中曰禹思天下之溺猶己溺之稷思天下之飢猶己飢之過門不入弗子其子至胼胝手足而不為病君

子不謂之過顏淵在陋巷飯蔬飲水終日如愚然君子不謂之不及蓋禹稷被髮纓冠而往救之者也顏淵明戶者也故孟子曰易地則皆然若顏淵禹稷不當其可則是楊墨而已君子不與也摸案程子上仁祖書有曰所謂道非大成不苟於用者顏回之徒是也天之大命在夫子矣故彼得自善其身非至聖人則不出也深有得乎顏子居

亂世之意

○公都子曰匡章通國皆稱不孝焉夫子

與之遊又從而禮貌之敢問何也

匡章齊人通國盡一國之人也禮貌敬之

也

孟子曰世俗所謂不孝者五惰其四支不顧父母之

養一不孝也博奕好飲酒不顧父母之養二不孝也好貨財私妻子不顧父母之養三不孝也從耳目之欲以

為父母戮四不孝也好勇鬪狠以危父母五不孝也章

子有一於是乎

好養從皆去聲很胡懇反戮羞辱也很忿戾也

夫章子子父

責善而不相遇也

夫音扶○遇合也相責以善而不相合故為父所逐也

責善朋

友之道也父子責善賊恩之大者

賊害也朋友當相責以善父子行之則害

天性之恩也

夫章子豈不欲有夫妻子母之屬哉為得罪於

父不得近出妻屏子終身不養焉其設心以為不若是

是則罪之大者是則章子已矣

夫章子之夫音扶為去聲屏必井反養去聲○

言章子非不欲身有夫妻之配子有子母之屬但為身不得近於父故不敢受妻子之養以自責罰其心以為

不如此則其罪益大也。○此章之旨於衆所惡而必察焉，可以見聖賢至公至仁之心矣。楊氏曰：「章子之行，孟子非取之也，特哀其志而不與之絕耳。」○集疏曰：「朱子曰：『孟子之於匡章，楊氏之論得之據章之所為，因責善於父而不相遇，雖是父不是，然便至如此蕩業出妻屏子終身不養，豈得為孝？故孟子言父子責善，賊恩之大者。』」此便是責之以不孝也。但其不孝之罪未至於可絕之地耳。後人因孟子不絕之則又欲盡雪章子之不孝，以為孝，此皆不公不正，倚於一偏也。必若孟子之所處，然後可見聖賢至公至仁之心矣。又曰：「匡章想是箇拘彊底人，觀其意屬於陳仲子可見。」惟其皆是此樣人，所以說得合。

○曾子居武城，有越寇，或曰：「寇至，盍去諸？」曰：「無寓人於我室，毀傷其薪木，寇退，則曰：『脩我牆屋，我將反寇退。』」曾子反左右曰：「待先生。」

如此其忠且敬也寇至則先去以為民望寇退則反殆於不可沈猶行曰是非汝所知也昔沈猶有負芻之禍

從先生者七十人未有與焉

與去聲○武城魯邑名盡何不也左右曾子之門人

也忠敬言武城之大夫事曾子忠誠恭敬也為民望言使民望而效之沈猶行弟子姓名也言曾子嘗舍於沈猶氏時有負芻者作亂來攻沈猶氏曾子率其弟子去之不與其難言師賓不與臣同子思居於

衛有齊寇或曰寇至盍去諸子思曰如彼去君誰與守

言所以不去之意如此

孟子曰曾子子思同道曾子師也父兄也

子思臣也微也曾子子思易地則皆然

微猶賤也尹氏曰或逮害或死

難其事不同者所處之地不同也君子之心不繫於利害惟其是而已故易地則皆能為之○孔氏曰古之聖賢言行不同事業亦異而其道未始不同也學者知此則因所遇而應之若權衡之稱物低昂屢變而不害其為同也○儲子曰王使人問夫子果有以異於人乎孟子

曰何以異於人哉堯舜與人同耳

○瞞古覓反○儲子齊人也○瞞竊視也○聖人

亦人耳豈有異於人哉○集疏曰楊氏曰聖人人倫之至也豈有異於人乎哉堯舜之道曰孝弟不過行止疾徐而已皆人所日用而昧者不知也夏葛而冬裘渴飲而飢食日出而作晦而息無非道者推是而求之則堯舜與人同○齊人有一妻一妾而處室者其良人出則其可知已

必饜酒肉而後反其妻問所與飲食者則盡富貴也其

妻告其妾曰良人出則必饜酒肉而後反問其與飲食者盡富貴也而未嘗有顯者來吾將矚良人之所之也蚤起施從良人之所之徧國中無與立談者卒之東郭墻間之祭者乞其餘不足又顧而之他此其為饜足之道也其妻歸告其妾曰良人者所仰望而終身也今若此與其妾訕其良人而相泣於中庭而良人未之知也施施從外來驕其妻妾

施音迤又音易墻音燔施施如字○章首當有孟子曰字闕文

也良人夫也饜飽也顯者富貴人也施邪施而行不使良人知也墻家也顧望也訕怨詈也施施喜悅自得之

貌由君子觀之則人之所以求富貴利達者其妻妾不

羞也而不相泣者幾希矣

孟子言自君子而觀今之求富貴者皆若此人耳使其妻

妾見之不羞而泣者少矣言可羞之甚也○趙氏曰言今之求富貴者皆以枉曲之道昏夜乞哀以求之而以驕人於白日與斯人何以異哉○集疏曰黃氏云孟子於辭受出處之際未嘗不拳拳焉齊王欲見則辭以疾王雖輔行則不與言欲授以室則却而不從欲留其行則卧而不應枉尺直尋則非之不辨禮義則非之既譬以鑽穴隙相窺又譬以登龍斷而罔利至於牆間之喻辭旨懇切若是者何邪義與利之間君子小人之所由分而天下國家治亂之所關繫也義者天理之公利者人欲之私循天理之公則辭受出處惟義之從惟命之安是既足以全吾此心之德矣以之治人則必能立懦而激貪以之事君則必能仗節而死義徇人欲之私者

反是卑辱苟賤惟利之趨既已喪其本心矣則傷風敗教欺君誤國皆斯人為之也聖賢安得不深致其戒哉今觀墻間一章所以形容其苟賤之態雖三尺童子亦知惡之然流俗滔滔務為卑諂工簡牘事苞苴脅脅諂笑搖尾乞憐自少至老自朝至暮無一念不在於是視吾身心為何物視天下國家為何事其未得之也則憂愁窮戚若不可以終日及其志得意滿則驕其親戚傲其里閭然其可賤尤甚於墻間而莫之覺也學者要當深明義利之辨充吾羞惡之心而養吾剛大之氣然後知孟子之言誠末俗之箴砭也

孟子集疏卷八

欽定四庫全書

經部

孟子集疏卷九

詳校官大理寺卿臣富炎泰

刑部郎中臣許兆椿覆勘

總校官進士臣朱鈐

校對官中書臣朱圻

膠錄監生臣蕭志鴻

欽定四庫全書

孟子集疏卷九

宋 蔡模 撰

萬章章句上

凡九章

萬章問曰舜往于田號泣于是天何為其號泣也孟子

曰怨慕也

號平聲○舜往于田耕歷山時也仁覆閔下謂之旻天號泣于旻天呼天而泣也事見虞

書大禹謨篇怨慕怨己之不得其親而思慕也

萬章曰父母愛之喜而不忘父

母惡之勞而不怨然則舜怨乎曰長息問於公明高曰

舜往于田則吾既得聞命矣號泣于旻天于父母則吾

不知也公明高曰是非爾所知也夫公明高以孝子之心為不若是恕我竭力耕田共為子職而已矣父母之

不我愛於我何哉

惡去聲夫音扶恕苦八反共平聲○長息公明高弟子公明高曾子弟子

于父母亦書辭言呼父母而泣也恕無愁之貌於我何哉自責不知已有何罪耳非怨父母也揚氏曰非孟子深知舜之心不能為此言蓋舜惟恐不順於父母未嘗自以為孝也若自以為孝則非孝矣帝使其

子九男二女百官牛羊倉廩備以事舜於畎畝之中天

下之士多就之者帝將胥天下而遷之焉為不順於父

母如窮人無所歸

為去聲○帝堯也史記云二女妻之以觀其內九男事之以觀其外又言

一年所居成聚二年成邑三年成都是天下之士就之也胥相視也遷之移以與之也如窮人之無所歸言其怨慕迫切

天下之士悅之人之所欲也而不足以解憂

好色人之所欲妻帝之二女而不足以解憂富人之所欲富有天下而不足以解憂貴人之所欲貴為天子而

不足以解憂人悅之好色富貴無足以解憂者惟順於

父母可以解憂

孟子推舜之心如此以解上文之意極天下之欲不足以解憂而惟順於父母

可以解憂孟子真知舜之心哉人少則慕父母知好色則慕少艾有妻

子則慕妻子仕則慕君不得於君則熱中大孝終身慕

父母五十而慕者予於大舜見之矣

必好皆去聲○言常人之情因物有

遷惟聖人為能不失其本心也父美好也楚詞戰國策所謂幼艾義與此同不得失意也熱中躁急心熱也言五十者舜攝政時年五十也五十而慕則其終身慕可知矣○此章言舜不以得衆人之所欲為已樂而以不順乎親之心為已憂非聖人之盡性其孰能之○集疏曰摸謂衆人之所欲者皆外物也順親者人之本心也溺於外物而失其本心則性不存矣故集註有取尹氏盡性之言

○萬章問曰詩云娶

妻如之何必告父母信斯言也宜莫如舜舜之不告而

娶何也孟子曰告則不得娶男女居室人之大倫也如

告則廢人之大倫以懟父母是以不告也

懟直類反○詩齊國風南

山之篇也信誠也誠如此詩之言也懟懟怨也舜父頑母嚚常欲害舜告則不聽其娶是廢人之大倫以離怨於父也萬章曰舜之不告而娶則吾既得聞命矣帝之妻

舜而不告何也曰帝亦知告焉則不得妻也

妻去聲○以女為人

妻曰妻程子曰堯妻舜而不告者以君治之而已如今之官府治民之私者亦多

萬章曰父母

使舜完廩捐階瞽瞍焚廩使浚井出從而拚之象曰謨

蓋都君咸我績牛羊父母倉廩父母干戈朕琴朕弼朕

二嫂使治朕棲象往入舜宮舜在牀琴象曰鬱陶思君

爾忸怩舜曰惟茲臣庶汝其于予治不識舜不知象之

將殺已與曰奚而不知也象憂亦憂象喜亦喜

反都禮

六反忤音尼與平聲○完治也捐去也階梯也揜蓋也
案史記曰使舜上塗廩瞽瞍從下縱火焚廩舜乃以兩
笠自捍而下得不死後又使舜穿井舜穿井為匿空
旁出舜既入深瞽瞍與象共下土實井舜從匿空中出去
即其事也象舜異母弟也謨謀也蓋蓋井也舜所居三
年成都故謂之都君咸皆也績功也舜既入井象不知
舜已出欲以殺舜為己功也干有也戈戰也琴舜所彈五
弦琴也珣珣弓也象欲以舜之牛羊倉廩與父母而自
取此物也二嫂堯二女也棲牀也象欲使為己妻也象
往舜宮欲分取所有見舜生在牀彈琴蓋既出即潛歸
其宮也鬱陶思之甚而氣不得伸也象言已思君之甚
故來見爾忤忤慚色也臣庶謂其百官也象素憎舜不
至其宮故舜見其來而喜使之治其臣庶也孟子言舜
非不知其將殺已但見其憂則憂見其喜則喜兄弟之

情自有所不能已耳萬章所言其有無不可知然舜之心則孟子有以知之矣他亦不足辯也程子曰象憂亦憂象喜亦喜人情天理於是為至曰然則舜偽喜者與曰否昔者有饋

生魚於鄭子產子產使校人畜之池校人烹之反命曰

始舍之圉圉焉少則洋洋焉攸然而逝子產曰得其所

哉得其所哉校人出曰孰謂子產智子既烹而食之曰

得其所哉得其所哉故君子可欺以其方難罔以非其

道彼以愛兄之道來故誠信而喜之奚偽焉

與平聲校音效又音

教畜許六反○校人主池沼小吏也圉圉困而未舒之貌洋洋則稍縱矣攸然而逝者自得而遠去也方亦道

也罔蒙蔽也欺以其方謂誑之以理之所有罔以非其道謂昧之以理之所無象以愛凡之道來所謂欺之以其方也舜本不知其偽故實喜之何偽之有○此章又言舜遭人倫之變而不失天理之常也○集疏曰或問諸說如何朱子曰程子所謂人性天理於是為至者尤為精切學者所宜反復而深思未易草草領略也其所疑萬章之言則林氏論之為詳然學者正欲識得舜之心耳此亦不足深論也林氏曰司馬公以為是時堯將以天下禪舜瞽象雖愚亦豈不利其子與凡之為天子而欲殺之乎借使殺之堯必誅已宜亦有所不敢矣蘇氏以為舜之側微已能使瞽象之不格姦矣豈至此而猶欲害之哉以此皆疑孟子之誤惟程子以為此非孟子之言乃萬章傳聞之誤而孟子有不暇辨耳是數說者恐其皆未安也蓋天下之事有不可以常情測度者使瞽象而猶知利害之所在則亦未為甚頑且傲而舜之所處亦未足為天下之至難矣不格姦者但能使之

不陷於刑戮若家語所謂索而殺之未嘗可得即此焚廩揜井之事也且聖賢於世俗傳聞之事有非實者必辨而明之以曉天下後世豈有知其不然而不暇辨者哉問舉天下之物不足以解憂惟順於父母可以解憂曰聖人一身渾然天理故極天下之至樂不足以動其事親之心極天下之至苦不足以害其事親之心一心所慕惟知有親凡天下事物皆是至輕施於兄弟亦然但知我是凡所當友愛其弟更不問如何且如父母使之完廩又却捐階焚廩及至免死下來當如何使之浚井又却從而揜之及至免死出來又當如何若是以下等人處此決是意不能平非獨下等人雖平日極知當孝其親者到父母以此施於己此心亦不能平定是動了象為弟日以殺舜為事若是他人亦須與他理會舜只知我是兄惟知友愛其弟那許多不好景象都自不見了此箇道理非獨舜有之人人皆有之非獨舜能為之人人皆可為之所以大學大要只要窮理舜明於庶

物察於人倫惟是許多道理見得極盡所以做出純是道理更無些子隔礙但舜是生知不待窮索如今須著窮索教盡其道只消做六七分那兩三分不消做盡也得○萬章問曰象日以殺舜

為事立為天子則放之何也孟子曰封之也或曰放焉

放猶置也置之於此使不得去也萬章疑舜何不誅之孟子言舜實封之而或者誤以為放也萬章曰

舜流共工于幽州放驩兜于崇山殺三苗于三危殛鯀

于羽山四罪而天下咸服誅不仁也象至不仁封之有

庠有庠之人奚罪焉仁人固如是乎在他人則誅之在

弟則封之曰仁人之於弟也不藏怒焉不宿怨焉親愛

之而已矣親之欲其貴也愛之欲其富也封之有庠富

貴之也身為天子弟為匹夫可謂親愛之乎

庠音鼻○流徙也共

工官名驩兜人名二人比周相與為黨三苗國名負固不服殺其君也殛誅也鯀禹父名方命圯族治水無

功皆不仁之人也幽州崇山三危羽山有庠皆地名也或曰今道州鼻亭即有庠之地也未知是否萬章疑舜不當封象使彼有庠之民無罪而遭象之虐非仁人之心也藏怒謂藏匿其怒宿怨謂留蓄其怨敢問

或曰放者何謂也曰象不得有為於其國天子使吏治其國而納其貢稅焉故謂之放豈得暴彼民哉雖然欲常常而見之故源源而來不及貢以政接于有庠此之

謂也

孟子言象雖封為有庠之君然不得治其國天子使吏代之治而納其所收之貢稅於象有似於放

故或者以為放也蓋象至不仁處之如此則既不失吾親愛之心而彼亦不得虐有庠之民也源源若水之相繼也來謂來朝覲也不及貢以政接于有庠謂不待及諸侯朝貢之期而以政事接見有庠之君蓋古書之辭而孟子引以證源源而來之意見其親愛之無已如此也○吳氏曰言聖人不以公義廢私恩亦不以私恩害公義舜之於象仁之至義之盡也○集疏曰或問仁之至義之盡是仁便包義如何曰自是兩義如舜封象于有庠不藏怒宿怨而富貴之是仁之至天子使吏治其國而納其貢稅是義之盡○吳氏名械字材老○

咸丘蒙問曰語云盛德之士君不得而臣父不得而子舜南面而立堯帥諸侯北面而朝之瞽瞍亦北面而朝

之舜見瞽瞍其容有戚孔子曰於斯時也天下殆哉
岌乎不識此語誠然乎哉孟子曰否此非君子之言齊
東野人之語也堯老而舜攝也堯典曰二十有八載放
勳乃徂落百姓如喪考妣三年四海遏密八音孔子曰
天無二日民無二王舜既為天子矣又帥天下諸侯以
為堯三年喪是二天子矣

朝音潮岌魚及反○咸丘蒙孟子弟子語者古語也

戚聲戚不自安也岌岌不安貌也言人倫乖亂天下將
危也齊東齊國之東鄙也孟子言堯但老不治事而舜
攝天子之事耳堯在時舜未嘗即天子位堯何由北面
而朝乎又引書及孔子之言以明之堯典虞書篇名今

此文乃見於舜典蓋古書二篇或合為一耳言舜攝位二十八年而堯死也徂升也落降也人死則魂升而魄降故古者謂死為徂落遏止也密靜也咸丘蒙曰舜之八音金石絲竹匏土革木樂器之音也

不臣堯則吾既得聞命矣詩云普天之下莫非王土率土之濱莫非王臣而舜既為天子矣敢問瞽瞍之非臣如何曰是詩也非是之謂也勞於王事而不得養父母也曰此莫非王事我獨賢勞也故說詩者不以文害辭不以辭害志以意逆志是為得之如以辭而已矣雲漢之詩曰周餘黎民靡有孑遺信斯言也是周無遺民也

不臣堯不以堯為臣使北面而朝也詩小雅北山之篇也普徧也率循也此詩今毛氏序云役使不均已勞於王事而不得養其父母焉其詩下文亦云大夫不均我從事獨賢乃作詩者自言天下皆王臣何為獨使我以賢才而勞苦乎非謂天子可臣其父也文字也辭語也逆迎也雲漢大雅篇名也子獨立之貌遺脫也言說詩之法不可以一字而害一句之義不可以一句而害設辭之志當以己意迎取作者之志乃可得之若但以其辭而已則如雲漢所言是周之民真無遺種矣惟以意逆之則知作詩者之志在於憂旱而非真無遺民也孝子之至莫大乎尊親尊親之至莫大乎以天下養為天子父尊之至也以天下養養之至也詩曰永言孝思孝思維則此之謂也

養去聲○言瞽瞍既為天子之父則當享天下之養此舜之所以為尊親養親

之至也豈有使之北面而朝之理乎詩大雅下武之篇言人能長言孝思而不忘則可以為天下法則也書

曰祇載見瞽瞍夔夔齊栗瞽瞍亦允若是為父不得而

子也

也見音現齊側皆反○書大禹謨篇也祇敬也載事

敬事瞽瞍往而見之敬謹如此瞽瞍亦信而順之也孟子引此而言瞽瞍不能以不善及其子而反見化於其子則是所謂父不得而子者而非如咸丘蒙之說也○集疏曰或問以意逆志朱子曰此是教人讀書之法須是虛心看他書道理是如何自家便迎接將來而今人讀書却是硬捉他來便不是逆志又曰大抵讀書須是虛心平氣優游玩味徐觀聖賢立言本意所向如何然後隨其遠近深淺輕重緩急而為之說如孟子所謂以意逆志者庶乎可以得之若便以吾先入之說橫於胸次而驅率聖賢之言以從己意設使義理可通已涉私

意穿鑿而不免於郢書燕說之誚況又義理窒礙亦有所不可行者乎

○萬章曰堯以天

下與舜有諸孟子曰否天子不能以天下與人

天下者天下之

天下非一人之私有故也

然則舜有天下也孰與之曰天與之

萬章問而

孟子答也

天與之者諄諄然命之乎

諄之諄反○萬章問也諄諄詳語之貌

曰

否天不言以行與事示之而已矣

行去聲下同○行之於身謂之行措諸天

下謂之事言但因舜之行事而示以與之之意耳

曰以行與事示之者如之何

曰天子能薦人於天不能使天與之天下諸侯能薦人

於天子不能使天子與之諸侯大夫能薦人於諸侯不

能使諸侯與之大夫昔者堯薦舜於天而天受之暴之

於民而民受之故曰天不言以行與事示之而已矣

暴

卜反下同○暴顯也言下能薦人於上不能令上必用之舜為天人所受是因舜之行與事而示之以與之之意

也曰敢問薦之於天而天受之暴之於民而民受之如

何曰使之主祭而百神享之是天受之使之主事而事

治百姓安之是民受之也天與之人與之故曰天子不

能以天下與人

治去聲

舜相堯二十有八載非人之所能為

也天也堯崩三年之喪畢舜避堯之子於南河之南天

下諸侯朝覲者不之堯之子而之舜訟獄者不之堯之子而之舜謳歌者不謳歌堯之子而謳歌舜故曰天也夫然後之中國踐天子位焉而居堯之宮逼堯之子是篡也非天與也

相去聲朝音潮夫音扶○南河在冀州之南其南即豫州也訟獄謂獄不決而

訟之也

泰誓曰天視自我民視天聽自我民聽此之謂也

自從也天無形其視聽皆從於民之視聽民之歸舜如此則天與之可知矣

○萬章問曰人

有言至於禹而德衰不傳於賢而傳於子有諸孟子曰否不然也天與賢則與賢天與子則與子昔者舜薦禹

於天十有七年舜崩三年之喪畢禹避舜之子於陽城
天下之民從之若堯崩之後不從堯之子而從舜也禹
薦益於天七年禹崩三年之喪畢益避禹之子於箕山
之陰朝覲訟獄者不之益而之啓曰吾君之子也謳歌
者不謳歌益而謳歌啓曰吾君之子也

朝音潮○陽城箕山之陰皆嵩

山下深谷中可藏處也故禹之子也楊氏曰此語孟子
必有所受然不可考矣但云天與賢則與賢天與子則
與子可以見堯舜禹之心皆無一毫私意也

丹朱之不肖舜之子亦不肖舜

之相堯禹之相舜也歷年多施澤於民久啓賢能敬承

繼禹之道益之相禹也歷年少施澤於民未久舜禹益相去久遠其子之賢不肖皆天也非人之所能為也莫之為而為者天也莫之致而至者命也

之相之相去聲相去之相如字

○堯舜之子皆不肖而舜禹之為相久此堯舜之子所以不有天下而舜禹有天下也禹之子賢而益相不久此啓所以有天下而益不有天下也然此皆非人力所為而自為非人力所致而自至者蓋以理言之謂之天自人言之謂之命其實則一而已 匹夫而有天下者德必若舜禹而又

有天子薦之者故仲尼不有天下

孟子因禹益之事歷舉此下兩條以推明

之言仲尼之德雖無愧於舜禹繼世以有天下天之所而無天子薦之者故不有天下

廢必若桀紂者也故益伊尹周公不有天下

繼世而有天下者其

先世皆有大功德於民故必有大惡如桀紂則天乃廢之如啓及太甲成王雖不及益伊尹周公之賢聖但能嗣守先業則天亦不廢之故益伊尹周公雖有舜禹之德而亦不有天下伊尹相湯以王於

天下湯崩太丁未立外丙二年仲壬四年太甲顛覆湯之典刑伊尹放之於桐三年太甲悔過自怨自艾於桐

處仁遷義三年以聽伊尹之訓已也復歸于亳

相王皆去聲艾

音义○此承上文言伊尹不有天下之事趙氏曰太丁湯之太子未立而死外丙立二年仲壬立四年皆太丁弟也太甲太丁子也程氏曰古人謂歲為年湯崩時外丙方二歲仲壬方四歲惟太甲差長故立之也二說未

知孰是顛覆壞亂也典刑常法也桐湯墓所在艾治也說文云艾草也蓋斬絕自新之意亳商所都也周

公之不有天下猶益之於夏伊尹之於殷也

此復言周公所以不

有天下之意

孔子曰唐虞禪夏后殷周繼其義一也

禪音擅○禪授

也或禪或繼皆天命也聖人豈有私意於其間哉○尹氏孔子曰唐虞禪夏后商周繼其義一也孟子曰天與賢則與賢天與子則與子知前聖之心者無如孔子繼孔子者孟子而已矣○集疏曰或問舜禹避位之說或者疑之以為舜禹之為相攝行天子之事久矣至此而復往避之有如天下歸之而朱均不順則將從天下而廢其君之子邪抑將奉其君之子而違天下之心邪是皆事之至逆而由避有以致之也至益不度天命而受位矣避之而天下不從然後不敢為匹夫猶且恥之而謂益為之乎是其說也奈何朱子曰愚嘗聞之師曰聖

人未嘗有取天下之心也舜也禹也益也於其君之老也奉命以行其事而已未嘗攝其位也於其君之終也位冢宰總百官以行方喪之禮而已未嘗繼其統也及夫三年之喪畢則當還政嗣君而告歸之時也於是去而避之亦禮之常而事之宜耳然其避去也其心固惟恐天下之不吾釋也舜禹蓋迫於天命人心而不獲已者若益則求仁而得仁又何恥之有哉論者之學不足以及此而狃於利害權謀之習妄意以為聖賢之心亦若己之心而已矣蓋以曹操不肯釋兵歸國之心而為舜禹益謀則宜其以為不當去位而避朱均以曹丕累表陳避之心而為舜禹益謀則宜其幸舜禹之得之而以益之不得為可恥也嗚呼學者能反是心以求之則聖人之心庶乎其可見矣問莫之致而至者命也曰命有兩樣得之不得曰有命自是一樣天命之謂性又自是一樣雖是兩樣却只是一箇命天之命人有命之以厚薄脩短有命之以清濁偏正無非是命且如舜禹益相去

久遠是命之在外者其子之賢不肖是命之在內者聖人窮理盡性以至於命便能贊化育堯之子不肖他便不傳與子而傳與舜本是箇不好底意思却被他一轉轉得好問孟子外丙二年仲壬四年集註兩存趙氏程氏之說則康節之說亦未可據邪曰如何便信得又問如此則堯即位於甲辰年亦未可據也曰此却據諸歷書如此說恐或有之然亦未可必曰若如此則二年四年亦可推矣曰却為中間年代不可紀自共和以後方可紀則湯時自無由可推○萬章問曰人有言伊尹以此類且當闕之不必深考

割烹要湯有諸

要平聲下同○要求也按史記伊尹欲行道以致君而無由乃為有莘氏之媵

臣負鼎俎以滋味說湯致於孟子曰否不然伊尹耕於王道蓋戰國時有為此說者

有莘之野而樂堯舜之道焉非其義也非其道也祿之

以天下弗顧也繫馬千駟弗視也非其義也非其道也

一介不以與人一介不以取諸人

樂音洛○莘國名樂堯舜之道者誦其詩

讀其書而欣慕愛樂之也駟四匹也介與草芥之芥同言其辭受取與無大無細一以道義而不苟也○集疏

曰楊氏曰一介之與萬鍾若論利則有多寡若論義其理一也伊尹惟能一介知所取子故能祿之以天下弗

顧繫馬千駟弗視自後世觀之則一介不以與人為太吝一介不以取諸人為太潔然君子之取予適於義而

已孔子於公西赤之富不恤其請於原憲之貧不許其辭此知所予者也孟子言非其道則一簞食不可受於

人如其道則舜受堯之天下湯使人以幣聘之囂囂然不以為泰此知所取者也

曰我何以湯之聘幣為哉我豈若處畎畝之中由是以

樂堯舜之道哉

囂五高反又戶驕反
囂囂無欲自得之貌

湯三使往聘之

既而幡然改曰與我處畎畝之中由是以樂堯舜之道

吾豈若使是君為堯舜之君哉吾豈若使是民為堯舜

之民哉吾豈若於吾身親見之哉

幡然變動之貌於吾
身親見之言於我之

身親見其道之行不徒誦說向慕之而已也○集疏曰
朱子曰伊尹是兩截人方其耕於莘野若將終身是一
截人及湯三聘幡然而往便以
天下之重為已仕是一截人

天之生此民也使先知

覺後知使先覺覺後覺也予天民之先覺者也予將以

斯道覺斯民也非予覺之而誰也

此亦伊尹之言也知
謂識其事之所當然

覺謂悟其理之所以然覺後知後覺如呼寐者而使之寤也言天使者天理當然若使之也程子曰予天民之先覺謂我乃天生此民中盡得民道而先覺者也既為先覺之民豈可不覺其未覺者及彼之覺亦非分我所

有以予之也皆彼自有此理我但能覺之而已○集疏曰程子曰天民之先覺譬之皆睡他人未覺來以我先覺故搖擺其未覺者亦使之覺及其覺也元無少欠蓋亦未嘗有所增加也朱子曰此所謂天民但言天所生之民耳其曰天民之先覺蓋曰天生此民之中特為先覺者而已

思天下之民匹夫匹

婦有不被堯舜之澤者若已推而內之溝中其自任以

天下之重如此故就湯而說之以伐夏救民

推吐回反內音納說

音稅○書曰昔先正保衡作我先王曰予弗克俾厥后為堯舜其心愧恥若撻于市一夫不獲則曰時予之辜

孟子之言蓋取諸此是時夏桀無道暴虐其民故欲使湯伐夏以救之徐氏曰伊尹樂堯舜之道堯舜揖遜而伊尹說湯以伐夏者時之不同義則一也吾未聞枉已而正人者也況辱已以

正天下者乎聖人之行不同也或遠或近或去或不去

歸潔其身而已矣

行去聲○辱已甚於枉已正天下難於正人若伊尹以割烹要湯辱已甚

矣何以正天下乎遠謂隱遁也近謂仕近君也言聖人之行雖不必同然其要歸在潔其身而已伊尹豈肯以割烹要吾聞其以堯舜之道要湯未聞以割烹也林氏

湯哉

堯舜之道要湯者非實以是要之也道在此而湯之聘自來耳猶子貢言夫子之求之異乎人之求之也愚謂此語亦猶前章所論伊訓曰天誅造攻自牧宮朕載自父不得而子之意

亳

伊訓商書篇名孟子引以証伐夏救民之事也今書牧宮作鳴條造載皆始也伊尹言始攻桀無道由我始

其事於亳也○集疏曰朱子嘗問學者曰如何是伊尹樂堯舜之道對以飢食渴飲鑿井耕田自有可樂曰龜山答胡文定書是如此說要之不然須是有所謂堯舜之道如書云人心惟危道心惟微惟精惟一允執厥中此便是堯舜相傳之道如克明俊德以親九族至協和萬邦黎民於變時雍如欽明文思溫恭允塞歷象日月星辰數五典齊七政同律度量衡之類伊尹在莘野時須曾一一學來不是每日只耕鑿食飲過了或謂耕田鑿井便是堯舜之道此皆不實不然何以有豈若吾身親見之哉一句若是不著實只是脫空或問樂堯舜之道之說曰揚氏亦過之夫田夫野老之所日用固莫非堯舜之道然堯舜之所以為堯舜者其威德大業之全體但非一端所能盡而伊尹之所樂亦豈專在於此而已哉此蓋生於禪者之說昔有以此問某人如何是堯

舜之道者某人答云江上一犁春雨傳者悅其新奇高妙而不深考於其實遂取以為說而張大之其亦誤矣且如其言則伊尹之耕於野其於堯舜之道固已親見之久矣又何必堯舜其君堯舜其民而後為親見之邪問道義一物非其義則非其道矣一介不妄取予則其大者亦可知矣既曰非義又曰非道既曰一介又曰天下千駟何也曰道義云者兼舉體用而言也一介千駟極其多少而言也蓋人之氣質不同器識有異或務大而忽小或拘小而遺大故必兼舉而極言之然後足以見其德之全耳夫豈贅於言哉又曰知是知此事覺是覺此理程子此言盡之且如知得君之仁臣之敬子之孝父之慈是知此事又知得君之所以仁臣之所以敬父之所以慈子之所以孝是覺此理中

○萬章問曰或

謂孔子於衛主癰疽於齊主侍人瘠環有諸乎孟子曰

否不然也好事者為之也

癰於容反疽七余反好去聲
○主謂舍於其家以之為主

人也癰疽瘍醫也侍人奄人也瘠姓環名皆時
君所近狎之人也好事謂喜造言生事之人也於衛主

顏讎由彌子之妻與子路之妻兄弟也彌子謂子路曰

孔子主我衛卿可得也子路以告孔子曰有命孔子進

以禮退以義得之不得曰有命而主癰疽與侍人瘠環

是無義無命也

讎如字又音弊
○顏讎由衛之賢大夫
也史記作顏濁鄒彌子衛靈公幸臣彌

子瑕也徐氏曰禮主於辭遜故進以禮義主於斷制故
退以義難進而易退者也在我者有禮義而已得之不

得則有命存焉孔子不悅於魯衛遭宋桓司馬將要而殺之微

服而過宋是時孔子當阮主司城貞子為陳侯周臣

要平

聲○不悅不樂居其國也桓司馬宋大夫向魋也司城貞子亦宋大夫之賢者也陳侯名周按史記孔子為魯司寇齊人饋女樂以間之孔子遂行適衛月餘去衛適宋司馬魋欲殺孔子孔子去至陳主於司城貞子孟子言孔子雖當阮難然猶擇所主況在齊吾聞觀近臣以衛無事之時豈有主癰疽侍人之事乎

其所為主觀遠臣以其所主若孔子主癰疽與侍人瘠

環何以為孔子

近臣在朝之臣遠臣遠方來仕者君子小人各從其類故觀其所為主與其

所主者而其人可知○集疏曰呂氏曰辭受有義得不得有命皆理之所必然有命有義是有可得可受之理故舜可以受堯之天下無命無義是無可得可受之理故孔子不主彌子以受衛卿或問此章之說程子所謂

聖人非不知命然於人事不得不盡此說非是者奈何
朱子曰人事即天命也人事不盡則禍患乃其自取而
天命不立矣故盡人事者是乃所以順天命而謹守之
此知命所以不立乎巖牆之下也若曰已知命之若彼
而姑盡其事之如此則是乃天人義命判然二物
又曰處置者求合乎義也故下者順受乎命也 ○萬

章問曰或曰百里奚自鬻於秦養牲者五羊之皮食牛

以要秦穆公信乎孟子曰否不然好事者為之也

食音嗣好

去聲下同○百里奚虞之賢臣人言其自賣於秦養牲
者之家得五羊之皮而為之食牛因以干秦穆公也

百里奚虞人也晉人以垂棘之璧與屈產之乘假道於

虞以伐虢宮之奇諫百里奚不諫

屈求勿反乘去聲○虞虢皆國名垂棘之

壁垂棘之地所出之璧也屈產之乘屈地所生之良馬也乘四匹也晉欲伐虢道經於虞故以此物借道其實欲并取虞宮之奇亦虞之賢臣諫虞公令勿許虞公不用遂為晉所滅百里奚知其不可諫故不諫而去之秦知虞公之不可諫而去之秦年已七十矣曾不知以食牛干秦穆公之為汙也可謂智乎不可諫而不諫可謂不智乎知虞公之將亡而先去之不可謂不智也時舉於秦知穆公之可與有行也而相之可謂不智乎相秦而顯其君於天下可傳於後世不賢而能之乎自鬻以成其君鄉黨自好者不為而謂賢者為之乎

相去聲○
自好自愛

其身之人也孟子言百里奚之智如此必知食牛以干主之為汙其賢又如此必不肯自鬻以成其君也然此事當孟子時已無所據孟子直以事理反覆推之而知其必不然耳○范氏曰古之聖賢未遇之時鄙賤之事不恥為之如百里奚為人養牛無足怪也惟是人君不致敬盡禮則不可得而見豈有先自汙辱以要其君哉莊周曰百里奚爵祿不入於心故販牛而牛肥使穆公忘其賤而與之政亦可謂知百里奚矣伊尹百里奚之事皆聖賢出處之大節故孟子不得不辯尹氏曰當時好事者之論大率類此蓋以其不正之心度聖賢也○集疏曰范氏曰虞之將亡宮之奇諫百里奚不諫若諫者是則不諫者非不諫者是則諫者非竊謂二人者皆是也宮之奇不忍虞公之亡諫而不聽然後以其族行君臣之義盡百里奚事虞公年七十而無所遇知其君不可諫不諫而先去之去就之理明宮之奇為忠臣百里奚為智士又按秦本紀晉獻公滅虞虜虞君與其大

夫百里奚百里奚亡秦走宛楚鄙人執之穆公聞百里
奚賢乃以五羖羊皮贖之穆公釋其囚與論國事授之
國政號曰五羖大夫商鞅傳又載趙良之言曰五羖大
夫荆之鄙人也聞穆公之賢而願見行而無資自鬻於
秦被褐食牛期年穆公知之舉之牛口之下而加之百
姓之上秦國莫敢望焉史記所傳自相矛盾而如此蓋得
之於好事者此正萬章之所疑也伊尹以割烹要湯百
里奚以食牛要穆公皆聖賢出處之大節故孟子不得
不辯或問此章之說朱子曰范氏詳且明矣其論百里
奚隱於市井本無干穆公之意又言聖賢未遇不恥鄙
賤之事而惡不由其道以得富貴此意甚正宜深味之
所引莊子之言亦甚善其辨史記之失尤佳摸謂戰國
之時人不知道惟知以功利為急以枉尺直尋說遇獲
禽為能甚者敢自誣於聖賢欲借以行其私如伊尹割
烹要湯孔子主癰疽瘠環百里奚自鬻於秦其見愈卑
其論愈下雖萬章之徒亦不知其為非而猶不免於疑

問習俗移人之深如此孟子
安得不歷數而明辨之哉

孟子集疏卷九

欽定四庫全書

孟子集疏卷十

宋 蔡模 撰

萬章章句下

凡九章

孟子曰伯夷目不視惡色耳不聽惡聲非其君不事非其民不使治則進亂則退橫政之所出橫民之所止不忍居也思與鄉人處如以朝衣朝冠坐於塗炭也當紂之時居北海之濱以待天下之清也故聞伯夷之風者頑夫廉懦夫有立志

治去聲下同橫去聲朝音潮○橫謂不循法度頑者無知覺廉者有

分辨懦弱也
餘並見前篇

伊尹曰何事非君何使非民治亦進亂

亦進曰天之生斯民也使先知覺後知使先覺覺後覺
予天民之先覺者也予將以此道覺此民也思天下之
民匹夫匹婦有不與被堯舜之澤者若已推而內之溝
中其自任以天下之重也

與音豫○何事非君言所事
即君何使非民言所使即民

無不可事之君無不可
使之民也餘見前篇

柳下惠不羞汙君不辭小官進

不隱賢必以其道遺佚而不怨阨窮而不憫與鄉人處
由由然不忍去也爾為爾我為我雖袒裼裸裎於我側

爾焉能浼我哉故聞柳下惠之風者鄙夫寬薄夫敦狹鄙

陋也敦厚也餘見前篇

孔子之去齊接浙而行去魯曰遲遲吾行

也去父母國之道也可以速而速可以久而久可以處

而處可以仕而仕孔子也

浙先厯反○接猶承也浙漬米水也漬米將炊而欲去之

速故以手承水取米而行不及炊也舉此一端以見其久速仕止各當其可也或曰孔子去魯不稅冕而行豈得為遲揚氏曰孔子欲去之意久矣不欲苟去故遲遲其行也膳肉不至則得以微罪行矣故不稅冕而行非也
孟子曰伯夷聖之清者也伊尹聖之任者也柳下惠

聖之和者也孔子聖之時者也

張子曰無所雜者清之極無所異者和之極勉

而清非聖人之清勉而和非聖人之和所謂聖者不勉
不思而至焉者也孔氏曰任者以天下為己責也愚謂
孔子任止久遠各當其可蓋兼三子之所以聖者而時
出之非如三子之可以一德名也或疑伊尹出處合乎
孔子而不得為聖之時何也程子曰終是任底意思在
○集疏曰問孔子時中所謂隨時而中否朱子曰然問
三子之德各偏於一亦盡於一德之中否曰非也既云
偏則不得謂之中矣三子之德但各至於一偏之極不
可謂之中問既云一偏何以謂之聖曰聖只是做到極
處自然安行不待勉強故謂之聖非中之謂也又曰伊
尹之任是自任以天下之重雖云祿之以天下弗受繫
馬于駒弗視然終是任處多柳下惠不以三公易其介
然終是多孔子之謂集大成集大成也者金聲而玉振之
和處多也金聲也者始條理也玉振之也者終條理也始條理

者智之事也終條理者聖之事也

此言孔子集三聖之事而為一大聖之事

猶作樂者集衆音之小成而為一大成也成者樂之一
終書所謂簫韶九成是也金鐘屬聲宣也如聲罪致討
之聲玉磬也振收也如振河海而不洩之振始始之所
終終之也條理猶言脈絡指衆音而言也智者知之所
及聖者德之所就也蓋樂有八音金石絲竹匏土革木
若獨奏一音則其一音自為始終而為一小成猶三子
之所知偏於一而其所就亦偏於一也八音之中金石
為重故特為衆音之綱紀又金始震而玉終詘然也故
並奏八音則於其未作而先擊鐃鐘以宣其聲俟其既
闋而後擊特磬以收其韻宣以始之收以終之二者之
間脈絡貫通無所不備則合衆小成而為一大成猶孔
子之知無不盡而德無不全也金聲玉振始終條理疑
古樂經之言故兒寬云惟天子建中和之極魚總條貫
金聲而玉振之亦此意也○集疏曰問孔子集大成朱

子曰孔子無所不該無所不備非特兼三子所長而已但與三子比並說時亦皆兼其所長又曰金聲玉振只是解集大成古人作樂擊一聲鐘衆音遂作又擊一聲鐘衆音又齊作故金所以發衆音末則以玉振之所以收合衆音在裏面又曰金聲初打聲高其後漸低於衆樂之作必以此聲之玉聲先後一般但玉聲住時便截然於衆樂之終必以此振之始條理猶絲線頭相似琴笛絲頭許多條絲都在這裏始條理是致知終條理是力行如中庸博學審問慎思明辨大學格知至這是始條理如篤行與誠意正心以下是終條理又曰智是見得徹聖是行得到問夫子所以能集三子而大成者由其始焉知之深也蓋知之至行之必至三子之智始焉知之未盡故其行之雖各極其至終未免各失一偏非終條理者未到以其始條理已差之矣曰然智譬則巧也聖譬則力也由射於百步之外也其至爾力也其

中非爾力也

中去聲○此復以射之巧力發明聖智二字之義見孔子巧力俱全而聖智兼備三

子則力有餘而巧不足是以一節雖至於聖而智不足以及乎時中也此章言三子之行各極其一偏孔子之道兼全於衆理所以偏者由其蔽於始是以缺於終所以全者由其知之至是以行之盡三子猶春夏秋冬之各一其時孔子則太和元氣之流行於四時也○集疏曰或問三子之偏如此而孟子以聖名之何也朱子曰三子之聖因其氣質之偏而力行以造極卒至乎不思不勉之地而表裏洞然無一毫人欲之私者雖謂之聖然於孔子則有不得而班者矣蓋以孟子之言推之則金玉備而巧力全者孔子也以學之序而論之則三子皆失其所當先故行愈力見愈偏然就三子而論之則伊尹之學又密於夷惠矣又曰三子却是天理中流出雖是過當直是無纖毫查滓又曰金聲之變無窮玉聲首尾如一振之者振而節之猶今樂之有拍也凡作樂

者始以金奏而後以玉振之猶聖人之合衆理而備於身也條理衆理之脈絡也始窮其然而縷析毫分者智也終備於身而渾然一貫者聖也二者惟孔子全之三子則始不盡而終不備也又曰金聲或洪或殺清濁萬殊玉聲清越和平首尾如一故樂之作也八音克諧雖若無所先後然奏之以金節之以玉其序亦有不可紊者焉蓋其奏之也所以極其變也其節之也所以成其章也變者雖殊而所以成者未嘗不一成者雖一而所歷之變洪纖清濁亦未嘗不具於至一之中聖人之知精粗小大無所不周聖人之德精粗小大無所不備其始卒相成蓋如此此金聲而玉振之所以譬夫孔子之集大成而非三子之所得與也然即其全而論其偏則洪而不能纖清而不能濁者是其金聲之不備也不能備乎金聲而遽以玉振之雖其所以振之者未嘗有異然其所振一全一闕則其玉之為聲亦有所不能同矣或問玉振金聲程子以喻始終或者之意以此有變有不變其說

孰是曰二說相闕不可偏廢金聲固是喻其始然始則有變玉振固是喻其終至終則無變也又問巧力曰三子力已至但射不中知處偏故至處亦偏如孔子則既聖且智巧力兼全故箭箭中紅心三子則各人中一邊緣他當初見得偏故至處亦偏問如此則三子不可謂之聖曰不可謂聖人大成畢竟他清是聖之清和是聖之和雖使聖人清和亦不過如此顏子則巧處工夫已至但只是力不至耳模亦嘗妄以射譬之孔子則堦堦中的三子則各中其堦之移之他堦則不能中矣此即集註各一其時流行四時之意也○北宮錡問曰周室班爵祿也如之何錡名衛人班列也孟子

子曰其詳不可得聞也諸侯惡其害已也而皆去其籍

然而軻也嘗聞其略也

惡去聲去上聲○當時諸侯兼并僭竊故惡周制妨害已之所

也為

天子一位公一位侯一位伯一位子男同一位凡五

等也君一位卿一位大夫一位上士一位中士一位下

士一位凡六等

此班爵之制也五等通於天下六等施於國中

天子之制地方

千里公侯皆方百里伯七十里子男五十里凡四等不

能五十里不達於天子附於諸侯曰附庸

此以下班祿之制也不能

猶不足也小國之地不足五十里者不能自達於天子因大國以姓名通謂之附庸若春秋邾儀父之類是也

天子之卿受地視侯大夫受地視伯元士受地視子男

視比也徐氏曰王畿之內亦制都鄙受地也元士上士也

大國地方百里君十卿祿

卿祿四大夫大夫倍上士上士倍中士中士倍下士下

士與庶人在官者同祿祿足以代其耕也

十倍之也
四倍之也

倍加一倍也徐氏曰大國君田三萬二千畝其入可食
二千八百八十人卿田三千二百畝可食二百八十八
人大夫田八百畝可食七十二人上士田四百畝可食
三十六人中士田二百畝可食十八人下士與庶人在
官者田百畝可食九人至五人庶人在官府史胥徒也
愚按君以下所食之祿皆助法之公田藉農夫之力以
耕而收其租土之無田與庶人在官
者則但受祿於官如田之入而已

次國地方七十里

君十卿祿卿祿三大夫大夫倍上士上士倍中士中士

倍下士下士與庶人在官者同祿祿足以代其耕也

三謂

三倍之也徐氏曰次國君田二萬四千畝可食二千一百六十人卿田二千四百畝可食二百十六人小國

地方五十里君十卿祿卿祿二大夫大夫倍上士上士

倍中士中士倍下士下士與庶人在官者同祿祿足以

代其耕也

二即倍也徐氏曰小國君田一萬六千畝可食千四百四十人卿田一千六百畝可食百

四十人耕者之所獲一夫百畝百畝之糞上農夫食九人

上次食八人中食七人中次食六人下食五人庶人在

官者其祿以是為差

食音嗣○獲得也一夫一婦佃田百畝加之以糞糞多而力勤者為

上農其所收可供九人其次用力不齊故有此五等庶人在官者其受祿不同亦有此五等也○愚按此章之

說與周禮王制不同蓋不可考闕之可也程子曰孟子之時去先王未遠載籍未經秦火然而班爵祿之制已不聞其詳今之禮書皆掇拾於煨燼之餘而多出於漢儒一時之傳會奈何欲盡信而句為之解乎然則其事固不可一一追復矣○集疏曰或問孟子所論班爵封國之制皆與周禮不同何也朱子曰是不可考矣蓋自孟子時已無明驗而周禮後出又有不可盡信者是以諸儒之說紛然而卒不能得其正也曰畿內受地之制其有稽乎曰周禮所謂公邑家邑小都大都者是矣而王制亦有天子縣內諸侯之數但其多寡與周禮復不同耳曰陳氏以為王之子弟及公卿以下其官不少也皆受地如列國之君則千里之畿有所不容疑亦視此以為差降非必盡如之也此說如何曰以周禮考之其制亦與孟子不同然大都則方百里而小都亦五十里也但王制以天子縣內諸侯祿之則國不繼世而食之亦無嫌於不容矣其據土以傳世者殆周禮之末失與

問百畝之田可食九人其次八人七人又其次六人五人此等差別是地有肥瘠邪抑糞灌之不同邪曰皆人力之不同耳然亦大約如此緣有此五等之祿故百畝所食有此五等問府史胥徒不知皆民為之抑別募游手為之曰不可曉想只是民為之然府史胥徒各自有祿以代耕則又似別募游手矣以周禮考之人數極多亦安得許多閒祿給之邪愚嘗疑周禮一書亦是起草未曾得行何以知之蓋左氏所記當時官號職位甚詳而未嘗及於府史胥徒則疑其方出於周公草定之本而未經施行也使其有之人數極多何不略見於他書如至沒要緊職事亦設人甚多不知何故但當觀自漢以來及前代題名碑所帶人從胥史亦甚多又不知如何皆不可曉論周室制祿自上農夫食九人積之孔子使原思為宰與之粟九百而孟子為齊卿其祿十萬鍾然則自古至於秦漢

○萬章問曰敢問友孟子曰不挾

無不以穀粟制祿也

長不挾貴不挾兄弟而友友也者友其德也不可以有

挾也

挾者魚有而恃之之稱

孟獻子百乘之家也有友五人焉樂

正裘牧仲其三人則予忘之矣獻子之與此五人者友

也無獻子之家者也此五人者亦有獻子之家則不與

之友矣

乘去聲下同○孟獻子魯之賢大夫仲孫蔑也張子曰獻子忘其勢五人者忘人之勢不資其

勢而利其有然後能忘人之勢若五人者有獻子之家則反為獻子之所賤矣非惟百乘之家

為然也雖小國之君亦有之費惠公曰吾於子思則師

之矣吾於顏般則友之矣王順長息則事我者也

費音祕般

音班○惠公費邑之君也師所尊也友所敬也事我者所使也非惟小國之君為然也

雖大國之君亦有之晉平公之於亥唐也入云則入坐

云則坐食云則食雖疏食菜羹未嘗不飽蓋不敢不飽

也然終於此而已矣弗與共天位也弗與治天職也弗

與食天祿也士之尊賢者也非王公之尊賢也

疏食之食音嗣

平公王公下諸本多無之字疑闕文也○亥唐晉賢人也平公造之唐言入公乃入言坐乃坐言食乃食也疏

食糲飯也不敢不飽敬賢者之命也○范氏曰位曰天位職曰天職祿曰天祿言天所以待賢人使治天民非

人君所得專者也

舜尚見帝帝館甥于貳室亦饗舜迭為賓主

是天子而友匹夫也

尚上也舜上而見於帝堯也館舍也禮妻父曰外舅謂我舅者吾謂

之甥堯以女妻舜故謂之甥貳室副宮也堯舍舜於副宮而就饗其食

用下敬上謂之貴

貴用上敬下謂之尊賢貴貴尊賢其義一也

貴貴尊賢皆事之宜

者然當時但知貴貴而不知尊賢故孟子曰其義一也○此言朋友人倫之一所以輔仁故以天子友匹夫而不為詘以匹夫友天子而不為僭此堯舜所以為人倫之至而孟子言必稱之○集疏曰親親長長貴貴尊賢皆天下之大經固當各有所尚然亦不可以此而廢彼故鄉飲雖上齒而有爵者則俟賓主獻酬禮畢然後入又席於尊東使自為一列不為衆人所壓亦不壓却他人即所謂尊也如此則長長貴貴各不相妨固不以齒先於爵亦不以爵加於齒也

○萬章問曰敢問交際何心也孟子曰恭

也際接也交際謂人以禮儀幣帛相交接也曰卻之卻之為不恭何哉曰尊

者賜之曰其所取之者義乎不義乎而後受之以是為

不恭故弗卻也卻不受而還之也再言之未詳萬章疑交際之間有所卻者人便以為不恭何

哉孟子言尊者之賜而心竊計其所以得此物者未知合義與否必其合義然後可受不然則卻之矣所以卻之

為不恭也曰請無以辭卻之以心卻之曰其取諸民之不義

也而以他辭無受不可乎曰其交也以道其接也以禮

斯孔子受之矣萬章以為彼既得之不義則其餽不可受但無以言辭間而卻之直以心度其

不義而託於他辭以卻之如此可否邦交以道如餽贈聞戒周其飢餓之類接以禮謂辭命恭敬之節孔子受

之如受陽貨
烝豚之類也

萬章曰今有禦人於國門之外者其交也

以道其餽也以禮斯可受禦與曰不可康誥曰殺越人

于貨閔不畏死凡民罔不讞是不待教而誅者也殷受

夏周受殷所不辭也於今為烈如之何其受之

與平聲
讞書作

慙徒對反○禦止也止人而殺之且奪其貨也國門之

外無人之處也萬章以為苟不問其物之所從來而但

觀其交接之禮則設有禦人者用其禦得之貨以禮餽

我則可受之乎康誥周書篇名越顛越也今書閔作慙

無凡民二字讞怨也言殺人而顛越之因取其貨閔然

不知畏死凡民無不怨之孟子言此乃不待教戒而當

即誅者也如何而可受之乎殷受至為烈十四字語意

不倫李氏以為此必有斷簡或闕文者近之而愚意其

直為衍字耳然不可考姑闕之可也

曰今之諸侯取之於民也猶禦也苟

善其禮際矣斯君子受之敢問何說也曰子以為有王

者作將比今之諸侯而誅之乎其教之不改而後誅之

乎夫謂非其有而取之者盜也充類至義之盡也孔子

之仕於魯也魯人獵較孔子亦獵較獵較猶可而況受

其賜乎

比去聲夫音扶較音角○比連也言今諸侯之取於民固多不義然有王者起必不連合而盡

誅之必教之不改而後誅之則其與禦人之盜不待教而誅者不同矣夫禦人於國門之外與非其有而取之

二者固皆不義之類然必禦人乃為真盜其謂非有而取為盜者乃推其類至於義之至精至密之處而極言

之耳非便以為真盜也然則今之諸侯雖曰取非其有而豈可遽以同於禦人之盜也哉又引孔子之事以明世俗所尚猶或可從況受其賜何為不可乎獵較未詳趙氏以為田獵相較奪禽獸以祭孔子不違所以小同於俗也張氏以為獵而較所獲之多少也二說未知孰是曰然則孔子之仕也非事

道與曰事道也事道奚獵較也曰孔子先簿正祭器不

以四方之食供簿正曰奚不去也曰為之兆也兆足以

行矣而不行而後去是以未嘗有所終三年淹也

與平聲○

此因孔子事而反覆辯論也事道者以行道為事也事道奚獵較也萬章問也先簿正祭器未詳徐氏曰先以簿書正其祭器使有定數不以四方難繼之物實之夫器有常數實有常品則其本正矣彼獵較者將久而自

廢矣未知是否也兆猶卜之兆蓋事之端也孔子所以不去者亦欲小試行道之端以示於人使知吾道之果可行也若其端既可行而人不能遂行之然後不得已而必去之蓋其去雖不輕而亦未嘗不決是以未嘗終三年留於一國也孔子有見行可之仕有際可之仕有公養之仕

於季桓子見行可之仕也於衛靈公際可之仕也於衛

孝公公養之仕也

以見行可見其道之可行也際可接遇

子魯卿季孫斯也衛靈公衛侯元也孝公春秋史記皆無之疑出公軌也因孔子仕魯而言其仕有此三者故於魯則兆足以行矣而不行然後去而於衛之事則又受其交際問餽而不卻之一驗也○尹氏曰不聞孟子之義則自好者為於陵仲子而已聖賢辭受進退惟義所在愚按此章文義多不可曉不必強為之說○集疏

曰或問殷受夏周受殷所不辭也於今為烈趙氏有或說矣或者又謂若義在可受則三代受人之天下而不辭今禦人者乃為暴烈不義如此如何而可受其餽乎烈如詩序所謂厲王之烈者暴虐之意云爾或又以為烈光也三代相受而光烈至今也是三說者擇一而從之可也何至闕而不為之說乎朱子曰熟讀本文此十四字自與上下文不相似或者二說亦覺費力不若從李氏闕上下文亦不相似或者二說亦覺費力不若從李氏闕之之愈也然此章之文如獵較簿正之屬皆所未明是以備論而闕之耳又曰為之兆也兆是事之端猶縫罅也問孔子於季桓子見行可之仕孔子仕於定公而言桓子何也曰當時桓子執國柄定公亦自做主不起孔子之相由桓子及桓子受女樂孔子便行如陳常弑齊君孔子沐浴而告魯公又告桓子事勢可見問墮三都李氏何以不怨曰季氏是時自不奈陪臣何故假孔子之力以去之及既墮三都而三桓之勢遂衰所以桓子

甚悔臨死謂康子曰使仲尼之去而魯不終治者由我故也

○孟子曰仕非為貧也

而有時乎為貧娶妻非為養也而有時乎為養

為養並去聲下

同○仕本為行道而亦有家貧親老或道與時違而但為祿仕者如娶妻本為繼嗣而亦有為不能親操井臼

而欲資其餽養者

為貧者辭尊居卑辭富居貧

貧富謂祿之厚薄蓋仕不為道

己非出處之正故其所居但當如此

辭尊居卑辭富居貧惡乎宜乎抱關

擊柝

惡平聲柝音托○柝行夜所擊木也蓋為貧者雖不主於行道而亦不可以苟祿故惟抱關擊柝之

吏位卑祿薄其職易稱為所宜居也李氏曰道不行矣為貧而仕者此其律令也若不能然則是貪位慕祿而

已矣孔子嘗為委吏矣曰會計當而已矣嘗為乘田矣曰

牛羊茁壯長而已矣

委鳥偽反會工外反當丁浪反乘去聲茁阻刮反長上聲○此孔子

之為貧而仕者也委吏主委積之吏也乘田主苑囿

牧之吏也茁肥貌言以孔子大聖而嘗為賤官不以為

辱者所謂為貧而仕官卑祿薄而職易稱也○集疏曰

程子說孔子為乘田為委吏為司寇無不可者孟子則

必得賓師之位方能行道惟聖人

則無不遍大小方員無所不可

位卑而言高罪也立

乎人之本朝而道不行恥也

則非竊祿之官此為貧者之所以必辭尊富而寧處賤也○尹氏曰言為貧者不可以居尊居尊者必欲以

行道○集疏曰問位卑而言高罪也朱子曰只是言為

貧而仕只要在下位不當言責之地此是聖賢打乖處

非是教人不言也若立乎人之本朝而道不行則恥矣

問位卑而言高罪也以君臣之分言之固是如此然時

可以言而言亦豈得謂之出位曰前世固有草茅韋布之士獻言者然皆有所因皆有次第未有無故忽然犯分而言之患縱言之亦未見聽徒取辱耳若是明君自無壅蔽之患有言亦見聽不然豈可不循分而徒取失言之辱哉如史記說商鞅范雎之事彼雖小人然言皆有序不肯妄發愚嘗說賈誼固有才文章亦雄偉只是言語急迫失進言之序宜乎絳灌之徒不悅而文帝謙讓未遑也如韓信鄧禹諸葛孔明輩無不有一定之規模漸漸做將去所以所為皆卓然有成方是有定力會做事如賈誼胸次終是閑著事不得只管跳躑爆趨不已如乘生駒相似制御他未下所以言語無序而不能有所為也易曰艮其輔言有序悔亡聖人之意可見矣

○萬章曰士之不託諸侯何也孟子曰不敢也諸侯失

國而後託於諸侯禮也士之託於諸侯非禮也

託寄也謂不仕

而食其祿也古者諸侯出奔他國食其廩餼謂之寄萬
公士無爵土不得比諸侯不仕而食祿則非禮也

章曰君餽之粟則受之乎曰受之受之何義也曰君之

於氓也固周之

周救也視其空乏則周卹之無常數君待民之禮也

曰周之則受

賜之則不受何也曰不敢也敢問其不敢何也曰抱關

擊柝者皆有常職以食於上無常職而賜於上者以為不恭

也

賜謂予之祿有常數君所以待臣之禮也

曰君餽之則受之不識可常繼乎曰

繆公之於子思也亟問亟餽鼎肉子思不悅於卒也標
使者出諸大門之外北面稽首再拜而不受曰今而後

知君之犬馬畜伋蓋自是臺無餽也悅賢不能舉又不

能養也可謂悅賢乎

巫去聲下同標音杓使去聲○巫數也鼎肉熟肉也卒末也標麾也

數以君命來餽當拜受之非養賢之禮故不悅而於其末後復來餽時麾使者出拜而辭之犬馬畜伋言不以人禮待已也臺賤官主使令者蓋繆公愧悟自此不復令臺來致餽也舉用也能養者未必能用也況又不能養

乎曰敢問國君欲養君子如何斯可謂養矣曰以君命

將之再拜稽首而受其後廩人繼粟庖人繼肉不以君

命將之子思以為鼎肉使已僕僕爾亟拜也非養君子

之道也

初以君命來餽則當拜受其後有司各以其職繼續所無不以君命來餽不使賢者有亟拜之

勞也僕僕
煩猥貌

堯之於舜也使其子九男事之二女女焉百

官牛羊倉廩備以養舜於畎畝之中後舉而加諸上位

故曰王公之尊賢者也

下女字去聲○能養能舉悅賢之至也唯堯舜為能盡之而後

世之所當法也

○萬章曰敢問不見諸侯何義也孟子曰在國

曰市井之臣在野曰草莽之臣皆謂庶人庶人不傳質

為臣不敢見於諸侯禮也

質與贅同○傳通也質者士執雉庶人執鷩相見以自通

者也國內莫非君臣但未仕者與執贅在位之臣不同故不敢見也

萬章曰庶人召之役

則往役君欲見之召之則不往見之何也曰往役義也

往見不義也

往役者庶人之職
不往見者士之禮

且君之欲見之也何為

也哉曰為其多聞也為其賢也曰為其多聞也則天子

不召師而況諸侯乎為其賢也則吾未聞欲見賢而召

之也

為並
去聲

繆公亟見於子思曰古千乘之國以友士何

如子思不悅曰古之人有言曰事之云乎豈曰友之云

乎子思之不悅也豈不曰以位則子君也我臣也何敢

與君友也以德則子事我也奚可以與我友千乘之

君求與之友而不可得也而況可召與

亟乘皆去聲
與之與平聲

孟子引子思之言而釋之以明不可召之意

齊景公田招虞人以旌不至將

殺之志士不忘在溝壑勇士不忘喪其元孔子奚取焉

取非其招不往也

喪息浪反○說見前篇

曰敢問招虞人何以曰

以皮冠虞人以旃士以旂大夫以旌

皮冠田獵之冠也事見春秋傳然則

皮冠者虞人之所有事也故以是招之庶人未仕之臣通帛曰旃士謂已仕者交龍為旂折羽而注於旂干之

首曰旌

以大夫之招招虞人虞人死不敢往以士之招招

庶人庶人豈敢往哉況乎以不賢人之招招賢人乎

欲見

而召之是不賢人之招也以士之招招庶人則不敢往以不賢人之招招賢人則不可往矣

欲見賢

人而不以其道猶欲其入而閉之門也夫義路也禮門

也惟君子能由是路出入是門也詩云周道如砥其直

如矢君子所履小人所視

夫音扶底詩作砥之履反○詩小雅大東之篇底與砥同

礪石也言其平也矢言其直也視視以為法也引此以證上文能由是路之義萬章曰孔子君

命召不俟駕而行然則孔子非與曰孔子當仕有官職

而以其官召之也

與平聲○孔子方仕而任職君以其官名召之故不俟駕而行徐氏曰孔

子孟子易地則皆然○此章言不見諸侯之義最為詳悉更合陳代公孫丑所問者而觀之其說乃盡○集疏

曰問此章論難甚詳其綱領只在義路也禮門也惟君子能由是路出入是門朱子曰固是不出此二者然所

謂義所謂禮其中煞有節目如云往役義也往見不義也周之則受賜之則不受之類都是義之節目如云廩人繼粟庖人繼肉不以君命將之之類都是禮之節目又如於齊王餽兼金一百鎰而不受於宋餽七十鎰而受於薛餽五十鎰而受此等辭受都有義君子於細微曲折一一都要合義所以易中說精義入神以致用也義至於精則應事接物之間無一非義不問大事小事千變萬化吾之所以應之者如利刀快劍迎刃而解件件判作兩邊去孟子平日受用便是得此力今觀其所言所行無不是如此初間見梁惠王便劈作兩邊去○

孟子謂萬章曰一鄉之善士斯友一鄉之善士一國之善士斯友一國之善士天下之善士斯友天下之善士言己之善蓋於一鄉然後能盡友一鄉之善士推以友而至於一國天下皆然隨其高下以為廣狹也

天下之善士為未足又尚論古之人頌其詩讀其書不

知其人可乎是以論其世也是尚友也

尚上同言進而上也頌誦通論

其世論其當世行事之迹也言既觀其言則不可以不知其為人之實是以又考其行也夫能友天下之善士其所友衆矣猶以為未足又進而取於古人是能進其取友之道而非止為一世之士矣 ○齊宣王

問卿孟子曰王何卿之問也王曰卿不同乎曰不同有

貴戚之卿有異姓之卿王曰請問貴戚之卿曰君有大

過則諫反覆之而不聽則易位

大過謂足以亡其國者易位易君之位更立親

戚之賢者蓋與君有親親之恩無可去之義以宗廟為重不忍坐視其亡故不得已而至於此也

王勃

然變乎色

勃然變色貌

曰王勿異也王問臣臣不敢不以正

對

孟子言也

王色定然後請問異姓之卿曰君有過則諫反

覆之而不聽則去

君臣義合不合則去○此章言大臣之義親疎不同守經行權各有其分

貴戚之卿

小過非不諫也但必大過而不聽乃可易位

異姓之卿

大過非不諫也雖小過而不聽已可去矣然

三仁貴戚不能行之於紂而霍光異姓乃能行之於昌邑此又委任權力之不同不可以執一論也○集疏曰

或問卒章之說朱子曰孟子所謂易位者言其理當如是耳若三仁之事則比干箕子固有所不及為若微子

之去亦或其勢之不便也然觀其引身而去以全先王之世則其計慮亦豈苟然者哉若其力之可為則伊尹

霍光固以異姓之卿而行之矣況有骨肉之親者乎然世或疑此言有以起篡奪之禍者則孟子豈不嘗曰有

伊尹之志則可無
伊尹之志則纂乎

孟子集疏卷十

欽定四庫全書

孟子集疏卷十一

宋蔡模撰

告子章句上

凡二
十章

告子曰性猶杞柳也義猶桮棬也以人性為仁義猶以

杞柳為桮棬

桮音杯棬丘圓反○性者人生所稟之天理也杞柳拒桮桮棬屈木所為若卮匱之

屬告子言人性本無仁義必待矯揉而後成如荀子性惡之說也

孟子曰子能順杞柳

之性而以為桮棬乎將戕賊杞柳而後以為桮棬也如將戕賊杞柳而以為桮棬則亦將戕賊人以為仁義與

率天下之人而禍仁義者必子之言夫

戕音牆與平聲夫音扶○言如

此則天下之人皆以仁義為害性而不肯為是因子之言而為仁義之禍也○集疏曰朱子曰括捲想如今之卷衫杞抑只是而今造合箱者北人以此為箭謂之抑箭即蒲抑也又曰告子只是認氣為性見得性有不善須矯揉方善惟是程子斷得定所謂性即理也又曰杞抑必矯揉而為括捲性非矯揉而為仁義孟子辯告子數處皆是辯倒著告子便休不曾說盡道理 ○告子曰性猶湍水也決諸東

方則東流決諸西方則西流人性之無分於善不善也

猶水之無分於東西也

湍他端反○湍波流濳回之貌也告子因前說而小變之近於

揚子善惡混之說

孟子曰水信無分於東西無分於上下乎人

性之善也猶水之就下也人無有不善水無有不下

言水

誠不分東西矣然豈不分上下乎性即天理未有不善者也

今夫水搏而躍之可使

過額激而行之可使在山是豈水之性哉其勢則然也

人之可使為不善其性亦猶是也

夫音扶搏補各反○搏擊也躍跳也額

也水之過額在山皆不就下也然其本性未嘗不就下但為搏激所使而逆其性耳○此章言性本善故順之而無不善本無惡故反之而後為惡非本無定體而可以無所不為也○集疏曰或問此章之說朱子曰程子以為流水即揚子之說其大指固畧同矣然告子以善惡皆性之所無而生於習揚子以善惡皆性之所有而

成於修此亦有小異也又曰觀水之流而必下則水之性下可知觀性之發而必善則性之韞善可知模謂人

性之善猶水之就下此善字却是就人物稟受以後而言據其發用之初對其成就之極又自為陰陽也○

告子曰生之謂性

生指人物之所以知覺運動者而言告子論性前後四章語雖不同然其

大指不外乎此與近世佛氏所謂作用是性者畧相似

孟子曰生之謂性也猶白

之謂白與曰然白羽之白也猶白雪之白白雪之白猶

白玉之白與曰然

與平聲下同○白之謂白猶言凡物之白者同謂之白更無差別也白羽

以下孟子再問而告子曰然則是謂凡有生者同是一性矣

然則犬之性猶牛之性

牛之性猶人之性與

孟子又言若果如此則犬牛與人皆有知覺皆能運動其性皆無以

異矣於是告子自知其說之非而不能對也○愚按性者人之所得於天之理也生者人之所得於天之氣也

性形而上者也。氣形而下者也。人物之生，莫不有是性，亦莫不有是氣。然以氣言之，則知覺運動，人與物若不異也。以理言之，則仁義禮智之稟，豈物之所得而全哉？此人之性，所以無不善而為萬物之靈也。告子不知性之為理，而以所謂氣者當之，是以杞柳湍水之喻，食色無善無不善之說，縱橫繆戾，紛紜舛錯。而此章之誤，乃其本根。所以然者，蓋徒知知覺運動之蠢然者，人與物同，而不知仁義禮智之粹然者，人與物異也。孟子以是折之，其義精矣。○集疏曰：或問子以告子論性數章皆本乎生之謂性一言，何也？朱子曰：性之為說，吾既詳言之矣。告子不知理之為性，乃即其人之身而指其能知覺運動者以當之，所謂生者是也。始而見其但能知覺運動，非教不成，故有杞柳之譬。既屈於孟子之言，而病其說之偏於惡也，則又繼而為湍水之喻，以見其但能知覺運動，而非有善惡之分。又以孟子為未喻已之意也，則又於此章極其立論之本意，而索言之，至於孟子。

折之則其說又窮而終不悟其非也其以食色為言蓋猶生之云爾而公都子之所引又湍水之餘論也以是考之凡告子之論性其不外乎生之一字明矣但前此未有深究其弊者往往隨其所向各為一說以與之辯而不察其所以失之之端獨在於此是以其說雖多而訖無一定之論也曰然則告子固指氣質而言歟曰告子之所謂性者固不離乎氣質然未嘗知其為氣質而亦不知其有清濁賢否之分也程子曰論性不論氣不備論氣不論性不明者則又極至之言蓋孟子之言性善者前聖所未發也程子此言又孟子所未發也問告子言生之謂性曰他只是言生處精神魂魄凡動用處是也正如禪家說如何是佛曰見性是佛如何是性曰作用是性蓋謂目之視耳之聽手之捉執足之運奔皆性也故孟子問之曰生之謂性也猶白之謂白歟又關之曰犬之性猶牛之性牛之性猶人之性歟三節語猶戲謔然只得告子不知所答便休竟亦不曾說得性之

本體是如何又曰生之謂性如白之謂白而凡白無異白焉則是指形氣之生者以為性而謂物之所得於天者亦無不同矣犬牛人之形氣既異而有知覺能運動者生也有生雖同然形氣既異則其生而有得乎天之理亦異蓋在人則得其全而無有不善在物則有所蔽而不得其全是乃所謂性也故孟子以此詰之而告子理屈詞窮不能復對也此章乃告子迷謬之本根孟子開示之要切蓋知覺運動者形氣之所為仁義禮智者天命之所賦學者正當審其偏正全闕而求知所以自貴於物不可以有生之同反自陷於禽獸而不自知己性之大全也摸按程子曰生之謂性性即氣氣即性生之謂也人生氣稟理有善惡然不是性中元有此兩物相對而生也有自幼而善有自幼而惡是氣稟有然也善固性也然惡亦不可不謂之性也蓋生之謂性人生而靜以上不容說繞說性時便已不是性也凡人說性只是說繼之者善也孟子言性善是也夫所謂繼之者

善也猶水流而就下也程子言生之謂性者二其曰性即氣氣即性者朱子謂發明告子之說其曰人生氣稟理有善惡然不是性中元有兩物相對而生也有自幼而善有自幼而惡是氣稟有然也善固性也惡亦不可不謂之性也此言告子但知氣底性有善有不善不知理底性無不善也又曰生之謂性人生而靜以上不容說凡人說性只是繼之者善也孟子言性善是也夫所謂繼之者善也猶水流而就下也此又發明孟子性善之說所以理底性者初不雜乎氣

○告子曰食色性也

仁內也非外也義外也非內也

告子以人之知覺運動者為性故言人之甘食

悅色者即其性故仁愛之心生於內而事物之宜孟子由乎外學者但當用力於仁而不必求合於義也孟子曰何以謂仁內義外也曰彼長而我長之非有長於我

也猶彼白而我白之從其白於外也故謂之外也

長上聲下

同○我長之我以彼為長也我白之我以彼為白也

曰異於白馬之白也無以異

於白人之白也不識長馬之長也無以異於長人之長

與且謂長者義乎長之者義乎

與平聲下同○張氏曰上異於二字疑衍李氏

曰或有闕文馬愚按白馬白人所謂彼白而我白之也長馬長人所謂彼長而我長之也白馬白人不同而長馬長人不同是乃所謂義也義不在彼之長而在我長之之心則義之非外明矣

曰吾弟則愛

之秦人之弟則不愛也是以我為悅者也故謂之內長

楚人之長亦長吾之長是以長為悅者也故謂之外也

言愛主於我故仁在內
敬主於長故義在外
曰耆秦人之炙無以異於耆吾

炙夫物則亦有然者也然則耆炙亦有外與

耆與嗜同
夫音扶

言長之耆之皆出於心也林氏曰告子以食色為性故因其所明者而通之○自篇首至此四章告子之辯屢屈而屢變其說以求勝卒不聞其能自反而有所疑也此正其所謂不得於言勿求於心者所以卒於鹵莽而不得其正也○集疏曰問甘食悅色固非性而全其天則食色固天性之自然朱子曰此說亦是但告子却不

知有所謂天則但見其能甘食悅色即謂之性耳又曰告子以其主於愛者為仁故曰內以其制是非者為義故曰外又問學者曰告子以知覺處為性如何與彼長而我長之相干皆未及對復曰告子只知得人心却不

知有道心他只見趨利避害飢寒飽暖等處而不知辨別那義利等處正是本然之性他所以道彼長而我長

之蓋謂我無長彼之心由彼長故不得不長之所以指
義為外也又曰白馬白人我道這是白馬這是白人言
之則一若長馬長人則不同長馬則是口道箇老大底
馬長人則是誠敬之心發於中所以為內也或問此章
之說曰飲食男女固出於性然告子以生為性則以性
為止於是矣因此又生仁內義外之說正與今日佛者
之言以作用為性義理為障者相類然孟子不攻其食
色之云者使彼知義之非外則性之不止於食色其有
以察○孟子子問公都子曰何以謂義內也孟子子疑
之矣孟仲子之
弟也蓋聞孟子之言曰行吾敬故謂之內也所敬之人
而未達故私論之曰行吾敬故謂之內也雖在外然
知其當敬而行吾心之鄉人長於伯兄一歲則誰敬曰
敬以敬之則不在外也鄉人長於伯兄一歲則誰敬曰
敬兄酌則誰先曰先酌鄉人所敬在此所長在彼果在

外非由內也

長上聲○伯長也酌酒也此皆季子問公都子答而季子又言如此則敬長之心

果不由中出也

公都子不能答以告孟子孟子曰敬叔父乎敬

弟子彼將曰敬叔父曰弟為尸則誰敬彼將曰敬弟子

曰惡在其敬叔父也彼將曰在位故也子亦曰在位故

也庸敬在兄斯須之敬在鄉人

惡平聲○尸祭祀所主以象神雖子弟為之然

敬之當如祖考也在位弟在尸位鄉人在賓客之位也庸常也斯須暫時也言因時制宜皆由中出也

季

子聞之曰敬叔父則敬敬弟則敬果在外非由內也公

都子曰冬日則飲湯夏日則飲水然則飲食亦在外也

此亦上章耄之意○范氏曰二章問答大指略同皆反覆譬喻以曉當世使明仁義之在內則知人之性善而皆可以為堯舜矣○集疏曰朱子曰向與陸氏辨義外之說某謂事之合如此者雖是在外然於吾心以為合如此而行之便是內也且如人有性質魯鈍或一時見不到因他人說出來見得為是從而行之亦內也陸氏以謂此乃告子之見直要自得於己者方是若以他人之說為義而行之是求之於外也遂於事當如此處亦不如此不知此

○公都子曰告子曰性無善無不善

也此亦生之謂性食色性也之意

或曰性可以為善可

以為不善是故文武興則民好善幽厲興則民好暴

好去

聲○此即湍水之說也

或曰有性善有性不善是故以堯為君而

有象以瞽瞍為父而有舜以紂為兄之子且以為君而

有微子啓王子比干

韓子性有三品之說蓋如此按此文則微子比干皆紂之叔父而書

稱微子為商王元子疑此或有誤字

今日性善然則彼皆非與

與平聲

孟子

曰乃若其情則可以為善矣乃所謂善也

乃若發語辭情者性之動

也人之情本但可以為善而不可以為惡則性之本善可知矣○集疏曰性不可說情却可說所以公都子問性孟子却答他情蓋謂情可為善則性無有不善所謂四端者皆情也仁是性惻隱是情也惻隱是仁發出來底端如一箇穀種相似穀之生是性發為萌芽是情也所謂性只是那仁義禮智四者而已四者無不善發出來則有不善殘忍便是惻隱之反冒昧便是羞惡之反孟子謂乃若其情則可以為善指其正者而言也若

夫為不善非才之罪也

夫音扶○才猶材質人之能也人有是性則有是才性既善則

才亦善人之為不善乃物欲陷溺而然非其才之罪也○集疏曰問才字是以其能解作用底說材質是合形體說否朱子曰是無形體說便是那好底材問集註言才猶材質才與材字之別如何曰才字是就義理上說材字是就用上說未嘗有材是指實用底說非天之降才爾殊是就義理上說又曰孟子道性善無形容處故說其發出來底曰乃若其情可以為善則性善可知若夫為不善非才之罪也是人自要為不善爾非才之不善也問情是才之動否曰情是這心裏動出有箇路脉曲折隨物恁地去才是能主張運動做事底如這事有人會做得有不曾做得有人會發揮得有不曾發揮得有不曾發揮得這處可見其才

惻隱之心人皆有

之羞惡之心人皆有之恭敬之心人皆有之是非之心

人皆有之惻隱之心仁也羞惡之心義也恭敬之心禮也是非之心智也仁義禮智非由外鑠我也我固有之也弗思耳矣故曰求則得之舍則失之或相信蓀而無

算者不能盡其才者也

惡去聲舍上聲蓀音師○恭者敬之發於外者也敬者恭之主

於中者也鑠以火銷金之名自外以至內也算數也言四者之心人所固有但人自不思而求之耳所以善惡相去之遠由不思不求而不能擴充以盡其才也前篇言是四者為仁義禮智之端而此不言端者彼欲其擴而充之此直因用以著其本體故言有不同耳○集疏曰問不能盡其才朱子曰才是能去恁地做底性本好發於情也只是好到得動用去做也只是好不能盡其才是發得畧好便自阻隔了不順他道理去做若盡其

才如盡惻隱之才則必當至於博施濟衆盡羞惡之才則必當至於一介不以取與祿之千乘弗顧繫馬千驎弗受這是本來自合恁地滔滔做去止緣人為私意阻隔多是畧有些發動後便遏折了又曰才本是善但為氣稟故有善有不善亦是人不能盡其才人皆有許多才聖人却做許多事我不曾做得些子出故孟子謂或相倍蓰而無算者詩曰天生蒸民有物有則民之秉夷不能盡其才者也

好是懿德孔子曰為此詩者其知道乎故有物必有則

民之秉夷也故好是懿德

好去聲○詩大雅蒸民之篇蒸詩作烝衆也物事也則法

也夷詩作彝常也懿美也有物必有法如有耳目則有聰明之德有父子則有慈孝之心是民所秉執之常性也故人之情無不好此懿德者以此觀之則人性之善可見而公都子所問之三說皆不辨而自明矣○程子

曰性即理也理則堯舜至於塗人一也才稟於氣氣有清濁稟其清者為賢稟其濁者為愚學而知之則氣無無清濁皆可以至於善而復性之本湯武身之是也孔子所言下愚不移者則自暴自棄之人也又曰論性不論氣不備論氣不論性不明二之則不是張子曰形而後有氣質之性善反之則天地之性存焉故氣質之性君子有弗性者焉愚按程子此說才字與孟子本文小異蓋孟子專指其發於性者言之故以為才無不善程子專指其稟於氣者言之則人之才固有昏明彊弱之不同矣張子所謂氣質之性是也二說雖殊各有所當然以事理考之程子為密蓋氣質所稟雖有不善而不害性之本善性雖本善而不可以無省察矯揉之功學者所當深玩也○集疏曰或問公都子問性而孟子以情與才者告之何也朱子曰性之本體理而已矣情則性之動而有為才則性之具而能為者也性無形象聲臭之可形容也故以二者言之誠知二者之本善則性

之為善必矣曰然則程子何以言才之有不善也曰此
以其稟於氣者言之也蓋性不自立依氣而形故形生
質具則性之在是者為氣所拘而其理之為善者終不
可得而變但氣之不美者則其情多沲於不善才亦有
時而偏於不善若其所以為情與才之本然者則初亦
未嘗不善也曰孟子程子之說所以小異而不害其為
相同何也曰孟子初未嘗有氣質之說也孔子雖以性之
相近而言然亦不明言其為氣質也曰程張之說亦何
所據而云乎曰孔子雖不言相近之氣質然其於易大
傳之言性則皆與相近之云者不類是固不無二者之
分矣但聖人於此蓋罕言之而弟子有不得而聞者故
其傳者止是而無以互相發明耳孟子雖不言氣質之
性然於告子生之謂性之辯則亦既微發其端矣但告
子辭窮無復問辯故亦不得盡其辭焉孟子既沒學失
其傳吾儒之言性者漫不省此夫離穿鑿之說滿天下
學者方且昏迷眩瞶不知所定而為釋氏者又鼓其荒

誕之說而乘之雖其高妙虛無若不可詰然覈其實則所謂蠢動含靈皆有佛性之說所謂作用是性之說皆不過告子生與食色之餘論耳至於性之為理與仁義禮智之蘊惻隱羞惡恭敬是非之發則反以為前程妄想而棄絕之及論智愚善惡之不齊則舉而歸之輪回宿習不可致詰之地世人方且崇信而歸嚮之無有能異其說者及周子出始復推明太極陰陽五行之說以明人物之生其性則同而氣質之所從來其變化錯揉有如此之不齊者至於程子則又始明性之為理而與張子皆有氣質之說然後性之為善者無害於氣質之有不善氣質之不善者終亦不能亂性之必為善也曰孟子之言性也情也才也皆未嘗不善也而程子以來乃有以才為有善不善者何也曰以性而言則才與情本非有不善也特氣質之稟不齊是以才有所拘情有至善之德不能一於義理耳至於性則理而已矣其純粹

有損特其蔽之厚薄隨在不同耳曰然則孔子之所罕
言者孟子詳言之孟子之所言不盡者周程張子又詳
言之若是何邪曰道學不明異端競起時變事異不得
不然也又曰程子所謂性即是理而原其所自未嘗不
善者則自孟子以來未有及此者也不知性之為理而
以氣為性者苟揚之失蓋不難見獨韓子以仁義禮智
信為言則其說已優於二子但亦不察乎其所以不齊
者為氣使之然是以其論有所缺耳模謂公都子有疑
於孟子性善之論故舉告子與或人之說以為辨朱子
謂性無善無不善即胡氏蘇氏之說性可以為善可以
為不善即湍水之說有性善有性不善即韓子性有三
品之說但兩或之說猶知分別善惡惟告子無善無不
善之說最為無狀就無善無惡之名混然無所分別雖
為惡為罪總不妨也與今世之不擇善惡而顛倒是非
稱為本性者何以異哉公都子歷舉此三說正欲破孟
子性善之論然孟子不直以性善告之而告之以情與

才者何也蓋性之本體理而已矣無形象聲色之可形容故以情與才言之誠知情與才之無不善則性之本善可知矣下文說惻隱羞惡恭敬是非正是就性之初發動處以明未發動之理未舉蒸民之詩者當然之則固無物不體而此理之妙實根於人性之本然惟人生各稟此有常之性所以應事接物皆好此懿美之德而不容己也所謂懿德即所謂物之則也其曰好是者即指上文秉夷而言也天命之所謂賦者謂之則人性之所稟者謂之夷存於心而有所得則謂之德其實一而已矣孔子又加一必字於有則之上加一故字於好是之上其旨愈明矣孟子舉此詩者蓋謂秉夷好德心之所好處即是性之發動處就性初發動處指出以示人方見得此性之本善如無極而太極無方所無形狀如何說得亦須是就動而生陽靜而生陰處說起孟子論性正是如此至於孺子入井皆有怵惕之○孟子曰富喻尤更激發得人所以有功於萬世也

歲子弟多賴凶歲子弟多暴非天之降才爾殊也其所

以陷溺其心者然也

富歲豐年也賴藉也豐年衣食饒足故有所賴藉而為善凶年衣食

不足故有以陷溺其心而為暴

今夫薶麥播種而耰之其地同樹之時

又同淳然而生至於日至之時皆熟矣雖有不同則地

有肥磽雨露之養人事之不齊也

夫音扶薶音牟耰音憂磽苦交反○薶大

麥也耰覆種也日至之時謂當成熟之期也磽瘠薄也

○集疏曰呂氏曰今夫薶麥皆可以為美實不可言無

善無不善也地有肥磽猶稟厚者惡有不能移稟薄者

善亦不易以進非人十已百未足以若人雨露之養人

事之不齊猶習之變化雨露之滋播種以時猶習善者

故凡同類者舉相似也何獨至於人而疑之聖人與我

同類者

聖人亦人耳其性之善無不同也

故龍子曰不知足而為屨我

知其不為蕢也屨之相似天下之足同也

蕢音匱○蕢草器也不知

人足之大小而為之屨雖未必適中然必似足形不至成蕢也口之於味有同者也易

牙先得我口之所耆者也如使口之於味也其性與人

殊若犬馬之與我不同類也則天下何耆皆從易牙之

於味也至於味天下期於易牙是天下之口相似也

耆與

嗜同下同○易牙古之知味者言易牙所調之味則天下皆以為美也

惟耳亦然至於聲

天下期於師曠是天下之耳相似也

師曠能審音者也言師曠所和之音

則天下皆以為美也

惟目亦然至於子都天下莫不知其姣也不

知子都之姣者無目者也

姣古卯反○子都古之美人也姣好也

故曰口

之於味也有同者焉耳之於聲也有同聽焉目之於色

也有同美焉至於心獨無所同然乎心之所同然者何

也謂理也義也聖人先得我心之所同然耳故理義之

悅我心猶芻豢之悅我口

然猶可也草食曰芻牛羊是也穀食曰豢犬豕是也程子

曰在物為理處物為義體用之謂也孟子言人心無不悅理義者但聖人則先知先覺乎此耳非有以異於以

也程子又曰理義之悅我心猶芻豢之悅我口此語親切有味須實體察得理義之悅心真猶芻豢之悅口始得○集疏曰朱子曰孟子這一段前面說許多只是引喻理義是人所同然有那許多既相似這箇如何會不相似理只是事物當然底道理義是事之合宜處程子曰在物為理處物為義這心下看得道理皆有之如此做人人都道是好纔不如此做人人都道不好心之所同然然是然否之然人心同以為然者即理義也故云理義之悅我心猶芻豢之悅我口 ○孟子曰牛山之木嘗美矣以其郊

於大國也斧斤伐之可以為美乎是其日夜之所息雨露之所潤非無萌蘖之生焉牛羊又從而牧之是以若彼濯濯也人見其濯濯也以為未嘗有材焉此豈山之

性也哉

藥五割反○牛山齊之東南山也邑外謂之郊言牛山之木前此固嘗美矣今為大國之郊伐

之者衆故失其美耳息生長也日夜之所息謂氣化流行未嘗間斷故日夜之間凡物皆有所生長也萌芽也藥芽之旁出者也濯濯光潔之貌材材木也言山木雖伐猶有萌芽而牛羊又從而害之是以至於光潔而無草木也

雖存乎人者豈無仁義之心哉其所以放其良心者亦猶斧斤之於木也旦旦而伐之可以為美乎其日夜之所息平旦之氣其好惡與人相近也者幾希則其旦晝之所為有梏亡之矣梏之反覆則其夜氣不足以存夜氣不足以存則其違禽獸不遠矣人見其禽獸也

而以為未嘗有才焉者是宜人之情也哉

好惡並去聲
○良心者本

然之善心即所謂仁義之心也平旦之氣謂未與物接之時清明之氣也好惡與人相近言得人心之所同然也幾希不多也措械也反覆輾轉也言人之良心雖已放失然其日夜之間亦必有所生長故平旦未與物接其氣清明之際良心猶必有發見者但其發見至微而旦晝所為之不善又已隨而措亡之如山木既伐猶有萌蘖而牛羊又牧之也晝之所為既有以害其夜之所息夜之所息又不能勝其晝之所為是以展轉相害至於夜氣之生日以寢薄而不足以存其仁義之良故苟心則平旦之氣亦不能清而所好惡遂與人遠矣

得其養無物不長苟失其養無物不消

長上聲○山木人心其理一也

孔子曰操則存舍則亡出入無時莫知其鄉惟心之謂

與

舍音捨與平聲○孔子言心操之則在此捨之則失

去其出入無定時亦無定處如此孟子引之以明心
之神明不測得失之易而保守之難不可頃刻失其養
學者當無時而不用其力使神清氣定常如平旦之時
則此心常存無適而非仁義矣程子曰心豈有出入亦
以操舍而言耳操之道敬以直內而已○愚聞之師
曰人理義之心未嘗無唯持守之即在爾若於旦晝之
間不至枯亡則夜氣愈清夜氣清則平旦未與物接之
時湛然虛明氣象自可見矣孟子發此夜氣之說於學
者極有力宜熟玩而深省之也○集疏曰或問夜氣者
特休息之餘氣清明者耳程子遽以為良知良能者何
哉朱子曰良知良能非指夜氣而言也指夜氣之所存
者而言也蓋此章本以仁義之良心為主以為雖或流
於物慾而其莫夜既得休息則其氣復清明而有以存
夫此心耳及其旦晝而接物也則又枯而亡之是以流
於禽獸而不反耳其存其亡蓋皆以心言之初不以爲

氣之存亡也故又引孔子之言以明心之不可不操者其意益明矣但日夜所息以下只以好惡相近為良心之萌蘖不復更著心字故說者反謂氣有存亡而欲致養於氣則此章文意首尾衝決而日用之間所以用力者亦散漫無可守之要矣非程子以是明之孰能知其指之為然哉曰程子以為心無出入然則其有出入者其無乃非心之正邪曰出入而逐物者固非本心之正然不可謂本心之外別有出入之心也但不能操而存之則其出而逐物於外與其偶存於內者皆荒忽無常莫知其定處耳然所謂入者亦非此心既出而復自外入也亦曰逐物之心暫息則此心未嘗不在內耳學者於此苟能操而存之則此心不放而常為主於內矣易之陽絕於外而生於內者於卦為復象正如此而其象曰出入无疾朋來无咎則其意亦猶是也又曰人皆未有無仁義之心但為物欲所害恰似都無了然及其夜中休息之時不與物接其氣稍清自然仁義之良心却存

得此子所以平旦起來未與物接之時好惡皆合於理然纔方如此旦晝之所為來格亡了此仁義之心便依然都不見了至其甚也夜間雖得休息氣亦不清存此仁義之心不得便與禽獸不遠學者正當於旦晝之所為處理會克己復禮懲忿窒慾今此氣常清則仁義之心常存非是必待夜間萬慮澄寂然後用功也若如此則日間幹當甚事也又曰人心每日格於事物斲喪戕賊所餘無幾惟夜氣靜庶可以少存耳至夜氣之靜而猶不足以存則去禽獸不遠言人理都喪也前輩皆無明說某因將孟子反覆熟讀每一段三十過至此方看得出後看程子却說夜氣之所存者良知良能也與臆見合以此知觀書不可苟須熟讀深思道理自見又曰所謂好惡與人相近也者幾希今只要得去這好惡上理會日用間於這上見得分曉有得力處夜氣方與爾存夜氣上却未有工夫只是去旦晝理會這兩字是箇大關鍵這裏有工夫日間進得一分道理夜氣便添得

一分第二日更進得一分道理夜氣便添得三分日間只管進夜
日更進得一分道理夜氣便添得三分日間只管進夜
間只管添添來添去這裏便盛日間悠悠地過無工
夫不長進夜間便減了如此拮亡轉深夜氣轉虧損了
夜氣既虧愈無根脚日間愈見作壞這處便是拮之反
覆其違禽獸不違矣問夜氣旦氣曰此段首尾止為良
心設夜氣不足以存蓋言夜氣至清足以存得此良心
耳平旦之氣亦清亦足以存得此良心故其好惡猶與
人相近但此心存得不多時也至旦晝之所為則拮亡
之矣人多謂拮亡其夜氣亦非也謂旦晝之所為能拮亡
其良心也又曰這一段其所主在心程子云夜氣之所
存者良知也又曰良能也此說為當仁義之心人所固有但
放而不知求則天之所以與我者始有所汨沒矣是雖
如此然其日夜之所息至於平旦其氣清明不為利欲
所昏則本心好惡猶有與人相近處至其旦晝之所為
又有以拮亡之拮之反覆則雖有些夜氣亦不足以存

養其良心反覆只是循環夜氣不足以存則雖有人之
形其實與禽獸不遠故下文復云苟得其養無物不長
苟失其養無物不消良心之消長只在得其養與失其
養耳牛山之木嘗美矣是喻人仁義之心郊于大國斧
斤伐之猶人之放其良心日夜之所息雨露之所潤非
無萌蘖之生便是平坦之氣其好惡與人相近處旦晝
之所措亡則又所謂牛羊又從而牧之雖芽蘖之萌亦
且戕賊無餘矣又曰孔子言操則存舍則亡出入無時
莫知其鄉只是狀人之心是難把捉底物事而人之不
可不操而存出入便是上面操存舍亡入則是在這裏
出則是亡失了此大約泛言人心如此非指已放者而
言亦不必要於此論心之體也又曰孔子言操則存舍
則亡出入無時莫知其鄉四句而以惟心之謂與一句
結之正是直指心之體用而言其周流變化神明不測
之妙孔子只是說人心是箇活物須是操守不要放舍
心一也操而存則義理明而謂之道心舍而亡則物欲

肆而謂之人心亡不是無只是走作逐物去了自人心而收回便是道心自道心而放出便是人心頃刻之間恍惚萬狀所謂出入無時莫知其鄉也孟子大意只是操則存舍則亡兩句上心一放時便是斧斤之戕牛羊之牧一收斂在此便是日夜之息雨露之潤要人於旦暮時不為事物所汨又曰人心能操則常存豈特夜半平旦又曰程子謂在敬以直內而已如今最緊要工夫只在主一無適上其他道理總包在裏面問范淳夫女讀孟子曰孟子誤矣心豈有出入邪伊川聞之曰此女雖不識孟子却識心伊川此語是許之是不許之曰此女必天資高見此心常湛然安定無出入然衆人不能皆如此若通衆人論之心却是箇走作底物孟子所引夫子之言是通衆人說耳真氏夜氣箴云子盍觀夫冬之為氣乎木歸其根蟄坏其封凝然寂然不見兆朕而造化發育之妙實胚胎乎其中蓋闔者闢之基貞者元之本而艮所以為物之始終夫一晝一夜者三百六旬

之積故冬為四時之夜而夜乃一日之冬天壤之間羣動俱閒窈乎如未判之鴻濛維人之身嚮晦宴息亦當以造物而為宗必齊其心必肅其躬不敢弛然自放於牀第之上使慢易非辟得以賊吾之衷雖終日乾乾靡容一息之間斷而昏冥易忽之際尤當致戒慎之功蓋安其身所以為朝聽晝訪之地而夜氣深厚則仁義之心亦浩乎其不窮本既立矣而又致察於周旋事物之頃敬義夾持動靜交養則人欲無隙之可入天理皦乎其昭融然知及之而仁弗能守之亦空言其奚庸爰作箴以自砥常凜凜乎療痼摸謂此箴亦不妨有此理然非孟子夜氣之本意

○孟子曰無或乎王之不智也

或與

感同疑怪也王疑指齊王雖有天下易生之物也一日暴之十日寒

之未有能生者也吾見亦罕矣吾退而寒之者至矣吾

如有萌焉何哉

易去聲暴步卜反見音現○暴溫之也我見王之時火猶一日暴之也我退則

諂諛雜進之日多是十日寒之也雖有萌蘖之生我亦安能如之何哉

今夫弈之為數小

數也不專心致志則不得也弈秋通國之善奕者也使

弈秋誨二人弈其一人專心致志惟奕秋之為聽一人

雖聽之一心以為有鴻鵠將至思援弓繳而射之雖與

之俱學弗若之矣為是其智弗若與曰非然也

夫音扶繳音灼

射食亦反為是之為去聲若與之與平聲○弈圍碁也數技也致極也弈秋善弈者名秋也繳以繩繫矢而射也○程子為講官言於上曰人主一日之間接賢士大夫之時多親宦官宮妾之時少則可以涵養氣質而薰

陶德性時不能用識者恨之范氏曰人君之心惟在所
養君子養之以善則智小人養之以惡則愚然賢人易
疎小人易親是以寡不能勝衆正不能勝邪自古國家
治日常少而亂日常多蓋以此也○集疏曰黃氏云性
稟於天故在人無不善之性情發乎性故在人無不善
之情所以不善者氣昏之欲汨之也迨其氣清而欲窒
則善端未有不油然而生者性善故也書曰惟皇上帝
降衷於民詩曰天生烝民有物有則孩提之童至無知
也而皆知愛其親赤子入井於已無與也而見之者皆
怵惕火然泉達誰獨無是心哉有是心而不能養之養
之而不能致其志善端雖萌而為氣所昏為欲所汨天
固予我而我固賊之則與禽獸奚異哉誠能存養於齋
莊靜一之中省察於念慮云為之際使吾善端之萌通
達而無窒礙充足而無欠缺如萌蘖之生無牛羊斧斤
一暴十寒之患則其至於千雲蔽日也可必矣故為人
而合乎天為士而至於聖亦即此心而充養之爾孟子

發明養心之論而申之以專心致志之戒其示人之意切矣讀書至此而猶不悟焉則亦終於為小人之歸也豈不深可歎哉○孟子曰魚我所欲也能掌亦我所欲也二者

不可得兼舍魚而取熊掌者也生亦我所欲也義亦我

所欲也二者不可得兼舍生而取義者也舍上聲○魚與熊掌皆美

味而熊掌尤美也生亦我所欲所欲有甚於生者故不為苟得

也死亦我所惡所惡有甚於死者故患有所不辟也辟惡

皆去聲下同○釋所以舍生取義之意得得生也欲生惡死者雖衆人利害之常情而欲惡有甚於生死者乃秉彝義理之良心是以欲生而不為苟得惡死而有所不避也○集疏曰問生人心義道心乎朱子曰欲生惡

死人心也惟義所在道如使人之所欲莫甚於生則凡

可以得生者何不用也使人之所惡莫甚於死者則凡

可以辟患者何不為也

設使人無秉彛之良心而但有利害之私情則凡可以偷生免

死者皆將不顧禮義而為之矣

由是則生而有不用也由是則可以辟

患而有不為也

由其必有秉彛之良心是其能舍生取義如此

是故所欲有

甚於生者所惡有甚於死者非獨賢者有是心也人皆

有之賢者能勿喪耳

喪去聲○羞惡之心人皆有之但衆人汨於利欲而忘之惟賢者能

存之而一簞食一豆羹得之則生弗得則死噉爾而與

之行道之人弗受蹴爾而與之乞人不屑也

呼音嗣
故反
蹴

子六反○豆木器也
噉吐啐之貌
行道之人路中凡人
也蹴踐踏也乞人丐乞之人也不屑不以為潔也言雖

欲食之急而猶惡無禮有寧死而不食者是其
羞惡之本心欲惡有甚於生死者人皆有之也萬鍾則

不辨禮義而受之萬鍾於我何加焉為宮室之美妻妾

之奉所識窮乏者得我與

為去聲與平聲○萬鍾於我
何加言於我身無所增益也

所識窮乏者得我謂所知識之窮乏者感我之惠也上
言人皆有羞惡之心此言眾人所以喪之由此三者蓋

理義之心雖曰固有而物
欲之蔽亦人所易昏也

鄉為身死而不受今為宮室

之美為之鄉為身死而不受今為妻妾之奉為之鄉為

身死而不受今為所識窮乏者得我而為之是亦不可

以已乎此之謂失其本心

鄉為並去聲為之為並如字○言三者身外之物其得

失此生死為甚輕鄉為身死猶不肯受嗟蹴之食今乃為此三者而受無禮義之萬鍾是豈不可以止乎本心謂羞惡之心○此章言羞惡之心人所固有或能決死生於危迫之際而不免計豐約於宴安之時是以君子不可頃刻而不省察於斯焉○集疏曰或問十章之說朱子曰孟子所論宮室之美妻妾之奉窮乏得我此三者或物欲之尤人所易溺或意氣之私人所不能免者自非燭理素明涵養素定而臨事有省察之功未有不以此而易彼者也昔程子之門人有為不義者或問之曰是人從學之久豈其全無知識以至是邪程子曰謂之全無知識則不可但義理不能勝私欲之心即至此耳愚謂此言以責人言之則恕以教人言之則切尤足

以發明孟子

○孟子曰仁人心也義人路也

仁者心之德程子所

謂心如穀種仁則其生之性是也然但謂之仁則人不

知其切於己故反而名之曰人心則可以見其為此身

酬酢萬變之主而不可須臾失矣義者行事之宜謂之

人路則可以見其為出入往來必由之道而不可須臾

舍其路而弗由放其心而不知求哀哉

舍上聲○哀哉二字最宜

詳味令人惕人有雞犬放則知求之有放心而不知求

然有深省處程子曰心至重雞犬至輕雞犬放則知求之心放則不

知求豈愛其至輕而忘其至重哉弗思而已矣愚謂上

兼言仁義而此下專論求放心者能

求放心則不違於仁而義在其中矣學問之道無他求

其放心而已矣

學問之事固非一端然其道則在於求其放心而已蓋能如是則志氣清明義

理昭著而可以上達不然則昏昧放逸雖曰從事於學而終不能有所發明矣故程子曰聖賢千言萬語只是欲人將已放之心約之使反復入身來自能尋向上去下學而上達也此乃孟子開示切要之言程子又發明之曲盡其指學者宜服膺而勿失也○集疏曰問仁人心也朱子曰仁無形迹底物孟子恐人理會不得便說道只人心便是却不是把仁來形容人心乃是把人心來指示仁也蓋存得此心便是仁若此心放了又更理會甚仁今人之心靜時昏動時擾亂便皆是放了問仁人心也義人路也曰此猶人之行路耳心即人之有知識者路即聖賢所共由者孟子恐人不識故以此喻之然極論要歸只是心耳若於此心常得其正則仁在其中心矣故自舍其路而不由放其心而不知求以下一向說從心上去放心不獨是走作纔昏睡去也則是放又曰程叔子謂心本善流入於不善乃放也四端備於吾心心存然後能擴而充之心放則顛冥莫覺流入不善

如向為身死而不受今為妻妾之奉為之又如大學心不在焉亦是放又如曰雞犬放則未必有可求者惟是心纔求則便在未有求而不可得者知其為放而求之則不放矣而求之三字刺了又曰不在是外求得放心來只是求時便在我欲仁仁斯至矣又曰求放心非一心求一心只求底便是已收之心雖放之千百里之遠只一收便在此他本無去來也又曰程子所謂反復入身來者不是將已縱出了底依舊收拾轉來如七日來復終不是已往之陽重新將來復生這舊底已自過去了這裏自然生出來程子又云自能尋向上去下學而上達這是存得此心方可做去不是道塊然守得這心便了又曰上有學問二字在不只是求放心便休又曰孟子言學問之道惟在求其放心而程子亦言心在腔子裏今一向耽看文字令此心全體都奔在冊子上更不知有已便是無知覺不識痛癢之人雖讀得書亦何益哉又曰如學禮亦只是求放心學樂亦只是求放

心讀書讀詩致知力行皆只是求放心又曰此章求放心承上章失其本心說黃氏云心者神明之舍虛靈洞徹具衆理而應萬事者也然耳目口鼻之欲喜怒哀樂之私皆足以爲吾心之累此心一爲物欲所累則奔逸流蕩失其正理而無所不至矣是以古之聖賢戰戰兢兢靜存動察如履淵冰如奉槃水不使此心少有所放此孟子求放心之一語所以警學者之意切矣自秦漢以來學者所習不曰詞章之富則曰記問之博也視古人存心之學爲何事哉及周程倡明聖學以繼孟子不傳之緒故其所以誨門人者尤先於持敬敬則此心自存而所以求放心之要旨也摸謂或者但見孟子有無他而已矣之語便立爲不必讀書不必窮理只要存本心之說所以卒流於異學集註學問之事固非一端然其道則在於求放心而已正所以發明孟子之本意以救異學之失學者切宜字○孟子曰今有無名之指屈字玩味不可容易讀過也○

而不信非疾痛害事也如有能信之者則不遠秦楚之

路為指之不若人也

信與伸同為去聲○無名指手之第四指也

指不若人

則知惡之心不若人則不知惡此之謂不知類也

惡去聲○

不知類言其不知輕重之等也

○孟子曰拱把之桐梓人苟欲生之皆

知所以養之者至於身而不知所以養之者豈愛身不

若桐梓哉弗思甚也

拱兩手所圍也把一手所握也桐梓二木名○集疏曰黃氏云天運

乎上地處乎下陰陽五行周流乎中而人物生焉則人物者均稟天地之氣以為體而均得天地之心以為心也然人之所以異於物者又以其稟氣之正而其心為最靈人物並生於天地之間而獨異於萬物者如此其

可不知所以自貴乎聖賢教人必使之正其心修其身者蓋不若是則無以全天地之賦予而異於萬物也所謂正其心修其身者亦盡吾當然之理而已耳目手足百體具焉身也視明而聽聰手恭而足重此身之理而所以為身者也虛靈知覺百慮生焉心也仁義禮智以體惻隱羞惡辭讓是非以為用此心之理而所以為心者也內而察諸精神念慮之間外而審諸動容周旋之際無適而不當於理此心之所以正身之所以修也苟為不然則徇情縱欲悖理傷道亦將無所不至矣雖曰具人之形而與禽獸奚異哉孟子憂世之心切故舉其至輕以明其至重欲使斯人反而思之庶乎有以全吾身心之理而無愧於所以為人也 ○孟子

曰人之於身也兼所愛兼所愛則兼所養也無尺寸之膚不愛焉則無尺寸之膚不養也所以考其善不善者

豈有他哉於已取之而已矣

人於一身固當兼養然欲考其所養之善否者惟在

反之於身以審其輕重而已矣體有貴賤有大小無以小害大無以賤

害貴養其小者為小人養其大者為大人

賤而小者口腹也貴而大

者心志也今有場師舍其梧櫝養其櫟棘則為賤場師焉

舍上

聲擯音賈櫟音貳○場師治場圃者梧桐也擯梓也皆美材也櫟棘小槩非美材也

養其一指而

失其肩背而不知也則為狼疾人也

狼善顧疾則不能故以為失肩背之

喻飲食之人則人賤之矣為其養小以失大也

○為去聲飲食

之人專養口腹者也飲食之人無有失也則口腹豈適為尺寸之

膚哉

此言若使專養口腹而能不失其大體則口腹之養軀命所關不但為尺寸之膚而已但養小之人

無不失其大者故口腹雖所當養而終不可以小害大賤害貴也○集疏曰朱子曰此章言身則心具焉飲食

之人無有失也則口腹豈適為尺寸之膚哉此數句說得倒了也自難曉意謂使飲食之人真無所失則口腹

之養本無害然人屑屑理會口腹則必有所失無疑是以當知養其大體而口腹底他自會去討喫不到得餓

了○公都子問曰鈞是人也或為大人或為小人何也孟

子曰從其大體為大人從其小體為小人鈞同也從隨也大體心也

小體耳目之類也曰鈞是人也或從其大體或從其小體何也

曰耳目之官不思而蔽於物物交物則引之而已矣心

之官則思思則得之不思則不得也此天之所與我者

先立乎其大者則其小者不能奪也此為大人而已矣

官之為言司也耳司聽目司視各有所職而不能思是以蔽於外物既不能思而蔽於外物則亦一物而已又以蔽於外物交於此物其引之而去不難矣心則能思而思為職凡事物之來心得其職則得其理而物不能蔽失其職則不得其理而物來蔽之此三者皆天之所以與我者而心為大若能以立之則事無不思而耳目之欲不能奪之矣此所以為大人也然此天之此舊本多作比而趙注亦以比方釋之今本既多作此而注亦作此乃未詳孰是但作比字於義為短故且從今本云○范浚心箴曰茫茫堪輿俯仰無垠人於其間渺然有身是身之微太倉稊米參為三才曰惟心耳往古來今孰無此心心為形役乃獸乃禽惟口耳目手足動靜投

閒抵隙為厥心病一心之微衆欲攻之其與存者嗚呼
幾希君子存誠克念克敬天君泰然百體從令○集疏
曰或問十五章之說朱子曰大抵孟子此章之要正在
夫先立其大者之一言耳蓋大者既立則凡動靜云為
皆主於思而不隨於物其不中理者鮮矣又曰耳目之
官不能思故蔽於物耳目一物也外物一物也以物
而交乎耳目之物自然是被他引去也唯心之官則思
故思則得之不思則不得在人思不思之間耳然此物
乃天之與我者所謂大者也君子固當於思處用功能
不妄思是能先立其大者立字下得有力夫然後耳目
之官小者弗能奪也是安得不為大人哉問物交物曰
上物字主外物而言下物字主耳目言耳目謂之物者
以其不能思心能思所以謂之大體心之官主於思須
是要人主張起來若不思則邪思雜慮便順他去却害
事答張敬夫曰案本文耳目之官不思而蔽於物心之
官則思此兩節方是分別小體之不可從而大體當從

之意下文始結之云此二者皆天之所以與我者但當先立乎其大者則小者不能奪耳此章內先立乎其大者一句方是說用力處而此句內立字尤為要切又曰孟子說先立乎其大者則其小者弗能奪也此語最有力量且看他下一箇立字昔人有問焦先生為學之道焦曰某只是先立其大者以此觀之他之學亦自有要卓然豎起自家心便是立所謂敬以直內也又云范浚心箴向見呂伯恭甚忽之問須取此箴這甚某曰但見他說得好故取之曰似恁說話人也多說得到某曰正為少見有人能說得如此者此意蓋有在也摸案孟子歷陳賁賤小大之說又分別養其小者為小人養其大者為大人從其大體為大人從其小體為小人至天之所與我者先立乎其大者則其小者不能奪也又直指學者用力之要正與人心道心克己復禮之訓相為表裏人之歸也可不畏哉可不勉哉○范浚字茂明婺人

○孟子曰有天爵者有人爵者仁義忠信樂善不倦此

天爵也公卿大夫此人爵也

樂音洛○天爵者德義可尊自然之貴也

古之

人修其天爵而人爵從之

修其天爵以為吾分之所當然者耳人爵從之蓋不待求

之而自至也

今之人修其天爵以要人爵既得人爵而棄其

天爵則惑之甚者也終亦必亡而已矣

要音邀○要求也修天爵以要

人爵其心固已惑矣得人爵而棄天爵則其惑又甚焉終必并其所得之人爵而亡之也○集疏曰或問人爵

從之有以從之猶言其任之者如何朱子曰是蓋嫌其猶有意於人爵之求耳殊不知此章之意所以為天理

人欲之別者特在乎求與不求之間有意於求則是乃所謂修天爵以要人爵者孟子固已斥之矣其或不求

而自至則是乃理勢之必然者而又何嫌之有哉曰修
天爵以要人爵者雖曰修之而實已棄之久矣何待得
人爵而後始謂之棄邪曰若是者猶五霸之假仁猶愈於不假而不修耳○孟子曰欲貴者

人之同心也人人有貴於己者弗思耳

貴於己者謂天爵也

人之

所貴者非良貴也趙孟之所貴趙孟能賤之

人之所貴謂人以爵

位加已而後貴也良者本然之善也趙孟晉卿也能以爵祿與人而使之貴則亦能奪之而使之賤矣若良貴則人安得而賤之哉詩云既醉以酒既飽以德言飽乎仁義也所

以不願人之膏粱之味也今聞廣譽施於身所以不願

人之文繡也

聞去聲○詩大雅既醉之篇飽充足也願欲也膏肥肉粱美穀令善也聞亦譽也文

繡衣之美者也仁義充足而聞譽彰著皆所謂良貴也
○尹氏曰言在我者重則外物輕○集疏曰朱子曰
孟子只云弗思耳便實知得功夫只在這裏黃氏云富
與貴是人之所欲也聖賢之論乃獨重理義而輕富貴
何哉理義天之所賦也富貴人之所予也人之所予人
得而奪之天之所賦根於人心不可易也一輕一重蓋
有不難辨者然閭巷之人知有富貴而不知有理義學
士大夫則知理義矣然未有不知富貴所移而忘其所
可重若夫真知富貴之為輕理義之為重非知道者孰
能識之仁義禮智天之予我而吾心之所固有也充吾
之仁則愛人利物而居天下之廣居充吾之禮則別嫌
明微而立天下之正位充吾之義則體常盡變而行天
下之達道充吾之智則察倫明物而成天下之大業以
之為心則和而平以之為人則愛而公推之天下國家
則利澤施於今令名垂於後回視世之所謂富貴者不
過輿馬之赫奕飲食之豐美宮室之壯麗賢者得志有

所不為不賢者亦以養其不肖之身而遺臭於萬世
曾狗彘之不若而又何足以參於人哉故善學者要當
深明夫內外輕重之分在內者重則在外者輕在外者
愈輕則在內者愈重真積力久胸中泰然天理流行一
毫物欲不能為之累顏子之簞瓢陋巷曾點之鼓瑟浴沂
翛然悠然蓋將與造化相為酬酢天下之至貴無以加於
此矣孟子之
言豈欺我哉○孟子曰仁之勝不仁也猶水勝火今之

為仁者猶以一杯水救一車薪之火也不熄則謂之水

不勝火此又與於不仁之甚者也

與猶助也仁之能勝不仁必然之理也但

為之不力則無以勝不仁而人遂以為真不能勝是我之所為有以深助於不仁者也

亦終必亡

而已矣

言此人心亦且自急於為仁終必并與其所以為而亡之○趙氏曰言為仁不至而不反諸已

也○集疏曰朱子曰仁之勝不仁也猶水勝火以理言之則正之勝邪天理之勝人慾甚易而邪之勝正人慾之勝天理若甚難以事言之則正之勝邪天理之勝人慾甚難而邪之勝正人慾之勝天理却甚易蓋纔是蹉跌一兩件事便被邪來勝將去若以正勝邪則須是做得十分工夫方勝得他然猶自恐勝他未盡在正如人

身正氣稍不足邪便得以干之矣

○孟子曰五穀者種之美者也苟為

不熟不如莠稗夫仁亦在乎熟之而已矣

莠音踴稗音蒲賣反夫音扶

○莠稗草之似穀者其實亦可食然不能如五穀之美也但五穀不熟則反不如莠稗之熟猶為仁而不熟則反不如為他道之有成是以為仁必貴乎熟而不可徒恃其種之美又不可以仁之難熟而甘為他道之有成也○尹氏曰日新而不已則熟○集疏曰朱子曰釋氏問話只是一言兩句莠稗之熟者也儒者明經若通徹了

不用費辭亦一言兩句義理便明白
否則却是五穀不熟不如莠稗者也
○孟子曰羿之教

人射必志於彀學者亦必志於彀
彀古候反○羿善射者也志猶期也彀弓滿也

滿而後發射之
法也學謂學射
大匠誨人必以規矩學者亦必以規矩

大匠工師也規矩匠之法也○此章言事必有法然後

可成師舍是則無以教弟子舍是則無以學曲藝且然

況聖人之道乎

孟子集疏卷十一